



09836

文苑一

姚燧

姚燧字端甫世系見燧伯父樞傳父格燧生三歲而孤育於伯父樞樞隱居蘇門謂燧蒙暗教督甚急楊奐馳書止之曰燧令器也長自有成何以急爲且許醮以女年十三見許衡於蘇門十八始受學於長安衡未嘗教以爲文二十四自讀韓愈文而好之因是蓋沈酣於古稍出所作就正於衡衡亦賞之且戒曰弓矢爲物以待盜也使盜得之亦將待之文章固發聞士子之利器然先有能一世之名將何以應人之見役者哉非其人而與之與非其人而拒之均罪也非周身斯世之道也至元七年衡以國子祭酒

元史卷四十七 列傳

一

教貴胄奏召舊弟子十二人燧自太原驛致館下年三十八始爲秦王府文學兼提舉陝西四川中興等路學校十二年以秦王命安輯庸蜀明年漢嘉新附入諭其民又奉命招王立於合州又明年撫循夔府凡三使蜀皆稱職十七年除陝西漢中道按察司副使錄囚延安平反註誤人服其明決調山南湖北道按部澧州興學振民二十三年自湖北奉旨趨朝明年爲翰林直學士二十七年授大司農丞元貞元年以翰林學士召修世祖實錄初置檢閱官究覈故事燧與侍讀高道凝總裁之書成大德五年授江東廉訪使移病太平九年拜江西行省參政至大元年仁宗居潛邸開宮師府燧年已七十遣正字呂洙起燧爲太子賓客未幾除承旨學士尋拜太子少傅燧拜辭曰昔臣

先伯父樞尙力辭是官臣何敢受明年授翰林學士承旨  
知制誥兼修國史四年得告南歸再召不赴卒於家年七  
十六諡曰文燧學出許衡而辭章英挺則有天授宋末文  
士皆宗歐蘇其敝也尤沓平易至燧始宗韓柳以紹秦漢  
不屑歐蘇以下雄視元初遂開一代風氣故元代古文遠  
出南宋之上元初名臣世勳顯閥皆燧所書氣昌奇而聲  
奧閎巋然躋有元於兩漢高麗瀋陽王父子連姻帝室傾  
貲結朝臣一日欲求燧詩文燧靳不與至奉旨乃與之王  
贈謝幣帛金玉名畫五十筐盛陳致燧燧卽時分散諸屬  
官及史胥侍從止畱金銀付翰林苑爲公用器皿燧一無  
所取人問之燧曰彼藩邦小國唯以貨利爲重吾能輕之  
使知夫朝不以是爲意其器識豪邁類此然其文專長碑

元史卷四十七 列傳

二

版必附麗於事物酬酢於請託罕能自抒胸臆至於匡扶  
世教如賈誼陸贄韓愈杜牧之立言則亦未之有燧亦自  
言文章有題目者吾能爲之無題目者惟元明善能爲之  
吾不能也其在朝惟推轂士類未嘗一言建白利敵人或  
問之雖自言得人則法行然亦文士不究心政事之徵所  
著有牧庵文集五十卷國統離合圖若干卷行於世子三  
壘圻城

論曰前明葉子奇草木子曰傳世之盛漢以文晉以字唐  
以詩宋以理學元世詩書文學皆不如前代其可傳獨北  
樂府而明沈德符顧曲雜言論南曲北曲之分遂謂元未  
滅宋以前以雜劇取士語絕無稽況元之詩不如唐宋而  
古文則姚燧揭傒斯歐陽玄張養浩黃潛柳貫蘇天爵皆

祖述韓歐遠在南宋之上明黃宗義論元文獨以虞集姚燧二人並稱尚非篤論也使燧更畱意於經世進之於義理其成就豈可量哉

趙孟頫 趙與燕 鮮于樞

趙孟頫字子昂宋太祖子秦王德芳之後也五世祖秀安僖王子偁四世祖崇憲靖王伯圭高宗無子立子偁之子是爲孝宗伯圭其兄也賜第湖州故孟頫爲湖州人曾祖師垂祖希永父與豈仕宋皆至大官孟頫年十四用父蔭補官試中吏部銓法調眞州司戶參軍宋亡家居力學至元二十二年行臺侍御史程鉅夫奉詔搜訪遺逸於江南以孟頫入見孟頫才氣英邁神采煥發如神仙中人世祖顧之喜使坐右丞葉李上或言孟頫宋宗室子不宜使近

元史卷四十七 列傳

三

左右帝不聽時方立尙書省命孟頫草詔班天下帝覽之喜曰得朕心之所欲言詔集百官於刑部議法眾欲計至元鈔二百貫贖滿者死孟頫曰始造鈔時以銀爲本虛實相權今二十餘年間輕重相去至數十倍故改中統爲至元又二十年後至元必復如中統使民計鈔抵法疑於大重古者以米絹民生所須謂之二實銀錢與二物相權謂之二虛四者爲直雖升降有時終不大相遠也以絹計贖取爲適中況鈔乃宋人所勗施於邊郡金人襲而用之皆出於不得已迺欲以此斷人死命恐不可行也或輕孟頫南人年少責以沮格詔書孟頫持之愈堅議者無以難帝初欲大用孟頫忌者沮之二十四年六月授兵部郎中兵部總天下諸驛時使客飲食之費幾十倍於前吏無以供

給強取擾民增鈔給之而至元鈔法滯澀復不能行詔遣  
尚書劉宣與孟頫馳驛至江南問行省丞相慢令之罪許  
徑答諸路官孟頫受命往比還不答一人丞相桑葛大以  
爲譏時有王虎臣者言平江路總管趙全不法卽命虎臣  
往按之葉李執奏不宜遣虎臣帝不聽孟頫進曰趙全固  
當問然虎臣前守此郡多強買人田縱賓客爲姦利全數  
與爭虎臣怨之虎臣往必將陷全事縱得實人心不服帝  
悟乃改遣他使桑葛柄政每日旦鐘初鳴時卽坐省中六  
曹官後至者則答之孟頫偶後至斷事官遽引受答孟頫  
入訴於都堂右丞葉李曰古者刑不上大夫所以養其廉  
恥教之節義且辱士大夫是辱朝廷也桑葛乃慰孟頫使  
出自是所答惟曹史以下他日行東御牆外道險孟頫馬

元史卷四十七列傳

四

跌墮於河帝聞之移築御牆稍西二丈許二十七年遷集  
賢直學士是歲地震北京尤甚地陷黑沙水涌出人死傷  
數十萬帝深憂之時駐蹕龍虎臺遣阿剌渾撒里馳還召  
集賢翰林兩院官詢致災之由議者畏忌桑葛但泛引經  
傳及五行災異之言以修人事應天變爲對莫敢語及時  
政時桑葛遣使理算天下錢糧已徵入數百萬未徵者尙  
數千萬害民特甚民不聊生自殺者相屬逃山林者則發  
兵捕之皆莫敢沮其事孟頫勸阿剌渾撒里奏請赦天下  
盡與蠲除庶幾天變可弭帝從之草詔已具桑葛怒謂必  
非帝意孟頫曰凡錢糧未徵者其人死亡已盡何所從取  
非及是時除免之他日言事者尙以失陷錢糧數千萬歸  
咎尙書省豈不爲丞相深累邪桑葛悟民始獲蘇孟頫又

勸奉御徹里劾桑葛誅之自後大臣多以罪去帝欲使孟頫與聞中書政事孟頫固辭有旨令出入宮門無禁每見必從容語及治道多所裨益帝問汝趙太祖孫太祖行事汝知之乎孟頫謝不知帝曰太祖行事多可取者朕皆知之孟頫自念久在上側必爲人所忌力請補外二十九年出同知濟南路總管府事時總管闕孟頫獨署府事官事清簡愼獄矜疑爲僉廉訪事韋哈刺哈孫所忌將以事中之會修世祖實錄召孟頫還京師乃解奉旨書金字藏經旣成除集賢直學士江浙等處儒學提舉遷秦州尹未上至大三年召至京師以翰林侍讀學士預撰祀南郊祝文及擬進殿名議不合謁告去仁宗在東宮素知其名及卽位屢遷翰林學士承旨常字之而不名帝嘗以語近臣比

元史卷四十七 列傳

五

之唐李白王維宋蘇軾有不悅者閒之帝初若不聞者延祐六年得請南歸帝遣使賜衣幣趣之還朝以疾不果行至治元年英宗遣使卽其家傳書孝經二年賜上尊及衣二襲是歲六月卒年六十九追封魏國公諡文敏孟頫所著有尚書註有琴原樂原得律呂不傳之妙詩文清逸旁通佛老之旨篆隸行草書無不工絕外國使者多求其書其畫山水木石花竹人馬尤精緻前史官楊載稱孟頫之才頗爲書畫所掩知其書畫者不知其文章知其文章者不知其政事云妻管夫人子雍弈及弟孟籲竝以書畫肖其父兄雍二子鳳麟亦能畫蘭竹人馬與雍逼眞

趙與票字晦叔宋宗室子嘗登進士第爲鄂州教授至元十一年丞相伯顏旣渡江與票率其宗人之在鄂州者詣

軍門上書力陳不嗜殺人可以一天下且乞全其宗黨後伯顏朝京師世祖問宋宗室之賢者伯顏首以與票對十三年秋九月遣使召見上京授翰林待制朝廷立法多所咨訪進直學士轉侍講疏陳江南科斂急督矜括大姓宋世巨壟暴露皆大臣擅易明詔所爲二十七年京師霧四塞明年正月甲寅虎入南城與票又疏言虎應苛政乃權臣專政之咎退而家居待罪未幾桑葛敗平章不忽木奏與票貧窶有守世祖曰得非指權臣爲虎者邪賜鈔萬三千貫歲給其妻子衣糧後累遷翰林學士其伯祖淵嘗從朱熹游預修通鑑綱目凡例與票得家學之傳及入北方復從許衡講論衡重之與票旣老成宗命特官其子孟實以終養大德七年卒貧無以葬成宗命有司賻鈔五千

元史卷四十七 列傳

六

貫給舟車還葬台州封天水郡侯諡文簡

鮮于樞字伯璣號困學山民漁陽人官至太常典簿學書於張天錫早歲愧未及古偶適野見二人輓車行泥淖中遂悟書法酒酣驚放吟詩作字奇態橫生與趙孟頫齊名終元世學者不出此兩家或言孟頫妒其書重價購而燬之故傳世不多其語本無稽然亦可見其與趙頫頥矣作畫亦秀韻子去矜孫端皆能世其家學又其甥伯顏不花字蒼崖畏吾人草書似舅氏

黃潛

柳貫

吳萊

黃潛字晉卿婺州義烏人母童氏夢大星墜於懷乃有娠歷二十四月始生比成童授以書詩不一月成誦中延祐二年進士第授台州寧海丞凡鹽場亭戶及編戶之隸漕

司與財賦府者恃其不統於有司橫恣病民潛皆痛繩以  
法民有後母與僧通而酖殺其夫者反誣前子所爲獄將  
成潛微服陰察之卒白其姦僞惡少年名在盜籍方謀劫  
奪未行而邑大姓執之圖中賞格初無獲財左驗事久不  
決潛爲之疏別以其獄上論之如本條免死者十餘入遷  
兩浙都轉運鹽使司石堰西場監運改諸贛州判官巡海  
官舡例以三載一新費出於官而責足於民有餘則總其  
事者私焉潛擢節浮蠹而以餘錢還民驩呼而去奸民以  
僞鈔鉤結黨與脅攘人財官若吏聽其謀挾往新昌天台  
寧海東陽諸縣株連所及數百家郡府下潛鞠治潛一問  
皆引伏官吏除名同謀者皆杖遣之有盜繫錢塘縣獄游  
民賂獄吏私縱之假署文牒發其來爲鄉導逮捕二十餘

元史卷四十七

七

家潛訪得其情以正盜宐傳重議持僞文書來者又非州  
民俱械還錢塘誣者自明轉國子博士視弟子如朋友未  
始以師道自尊輕納人拜而來學者滋益恭業成而仕皆  
有聞於世時欲增設禮殿配位四配位合東坐而西向學  
官或議分置於左右同列不敢爭潛獨面折之事乃止出  
爲江浙等處儒學提舉潛亟請致仕絕江徑歸未幾召除  
翰林直學士知制誥同修國史尋兼經筵官旋上章求歸  
不俟報而行帝聞之遣使追還京師復爲前官久之始得  
謝南還凡七年卒年八十一追封江夏郡公諡文獻潛天  
資介特在州縣唯以清白爲治月俸弗給每鬻產佐之及  
升朝足不登權勢之門所著有日損齋稿二十三卷義烏

志七卷筆記一卷宋濂狀其行事

見宋文憲集



柳貫字道傳婺州浦江人少嘗受學於蘭溪金履祥又從宋諸遺老方鳳謝翱吳思齊仇遠戴表元吳澄游肆力於先秦兩漢程鉅夫授以墨一丸曰文章正印屬子矣始用察舉爲江山縣儒學教諭仕至翰林待制監察御史馬祖常薦其堪任風憲不報滿秩而歸杜門十餘年饘粥不給處之裕如與黃潛及臨川虞集豫章揭傒斯齊名號儒林四傑其處州廟碑記一篇論者謂直追韓愈旁工篆隸杜本謂不減李陽冰所著有文集四十卷字系二卷近思錄廣輯三卷金石竹帛遺文十卷門人宋濂狀其行

見宋文憲集

吳萊字立夫世居婺州集賢大學士直方子也幼羸弱雙

瞳碧色炯炯如岩下電七歲能賦詩嘗往族父幼敏家曰

易漢書一帙以去幼敏指谷永杜業傳叩之萊琅然背誦

元史卷四十七列傳

八

不遺一字二易他編皆如初因盡出所有書使讀之延祐

七年以春秋舉上禮部不利退居深衷山中益窮諸書奧

旨著尙書標說六卷春秋世變圖二卷春秋傳授譜一卷

古職方錄八卷孟子弟子列傳二卷楚漢正聲二卷樂府

類編一百卷唐律刪要二十卷平生喜論文嘗云作文如

用兵法法有正有奇正是法度要部伍分明奇是不爲法

度所縛千變萬化坐作進退擊刺一時俱起及其欲止什

伍各還其隊元不曾亂聞者服之柳貫素慎許與每稱萊

爲絕世才黃潛晚年謂人曰萊之文嶄絕雄深類秦漢間

人作吾操觚一世安敢及之御史行部舉茂才署饒州長

蘓書院山長未上而卒年僅四十有四門人宋濂胡翰等

私諡曰淵穎先生

貫雲石

貫雲石

舊連海  
涯號

功臣阿里海牙孫也父名貫只哥因以貫  
爲氏自號酸齋母廉氏夜夢神人授以大星吞之己而有  
娠及生神采秀異年十二三英爽有膂力使健兒驅三惡  
馬疾馳已持槊立待馬至騰上之越二而跨三運槊生風  
觀者辟易稍長折節讀書吐辭不蹈襲故常初襲父官爲  
兩淮萬戶鎮永州御軍嚴肅稍暇輒雅歌投壺意所暢適  
不爲形迹拘一日呼弟忽都海牙語曰吾平生宦情最薄  
願祖父之爵不敢不襲今已數年矣願以讓弟語訖卽解  
所縮金虎符佩之北從姚燧學燧見其古文峭厲有法及  
歌行古樂府慷慨激烈大奇之仁宗在東宮聞其以爵讓  
弟謂宮臣曰將相家子弟有如是賢者邪選爲說書秀才

元史卷四十七列傳

九

宿衛禁中仁宗踐阼上疏條六事曰釋邊戍以修文德教  
太子以正國本設諫官以輔聖德表姓氏以旌勳胄定服  
色以變風俗舉賢才以恢至道書凡萬餘言未報拜翰林  
侍讀學士忽喟然嘆曰辭尊居卑昔賢所尙今禁林清要  
與所讓軍資孰高人將議吾後矣遂稱疾還江南賣藥錢  
塘市詭姓名易服色人無有識之者偶過梁山灤見漁父  
織蘆爲被欲易之以紬漁父疑其人陽曰君欲吾被當爲  
賦詩遂援筆立就竟持被去遠近喧傳蘆花被詩晚年文  
日遂詩蓋冲澹草隸書稍取古人所長變化自成一家其  
視死生若晝夜絕不凝滯於物脩然欲遺世而獨立卒封  
京兆郡公諡文靖有詩文若干卷孝經直解一卷

阿榮

阿榮字存初怯烈氏祖耶先不花湖廣行省左丞相贈太師父按攤中書右丞阿榮幼事武宗備宿衛累遷湖南道宣慰副使溫德亨奉使宣撫湖南事無大小悉以委之會列郡歲饑阿榮分其廩祿爲粥以食餓者仍發粟振之所活甚眾廣西寇起眾皆洵懼阿榮鎮之以靜督有司治兵守其境寇不敢入遷湖廣行省左右司郎中召僉會福院事尋除吏部尚書泰定初出爲湖南宣慰使改浙東道宣慰使都元帥以疾辭天厯初復起爲吏部尚書尋參議中書省事二年拜中書參政知經筵事進奎章閣大學士太禧宗禮院使都典制神御殿事文宗眷遇之甚而阿榮亦盡心國政知無不言久之心忽鬱鬱不樂謁告南歸武昌後至元元年卒初阿榮閒居以文翰自娛博究前代治亂

元史卷四十七 列傳

十

得失見其會心者則捫腕曰忠臣孝子國家之寶爲奇男子烈丈夫者固不當如是邪日與韋布之士游所至山水佳處鳴琴賦詩日夕忘返尤深於數學逆推事之成敗及人福禍天壽貴賤多奇中天厯三年春策士於廷阿榮與虞集會於直廬慨然興歎語集曰更一科後科舉當輟輟兩科而復復則人材彬彬大出矣又歎曰榮不復見之矣君猶及見之集應曰得士之多幸如存初言今文治方興未必有中輟之理存初國家世臣妙於文學以盛年登朝在上左右斯文屬望集老且衰見亦何補邪阿榮又歎曰數當然耳集問何以知之弗荅後三年卒元統三年科舉果罷至正元年始復如其言

戴表元字帥初一字曾伯慶元奉化州人宋咸淳中登進士乙科教授建寧府後遷臨安教授行戶部掌故皆不就大德八年執政薦於朝起家拜信州教授再調教授婺州以疾辭初表元閔宋季文章氣萎茶而辭賦敝徹已甚慨然以振起斯文爲己任時四明王應麟天台舒岳祥並以文學師表一代表元皆從受業故其學博而肆其文清澹雅潔化陳腐爲神奇蓄而始發至元大德間東南以文章大家名重一時者惟表元而已其門人取知名者曰袁桷桷之文其體裁議論一取法於表元者也表元晚年翰林集賢以修撰博士二職論薦而老疾不可起年六十有七卒有剡源集行於世當表元時有四明任士林者亦以文章知名云

元史卷四十七 列傳

十一

閻復

閻復字子靖高唐人始生有奇光照室性簡重美丰儀弱冠入東平學師事名儒康晁時嚴實領東平行臺招諸生肄進士業迎元好問校試預選者四人復爲首徐珍李謙孟祺次之歲己未始掌書記於行臺擢御史掾至元八年用王磐薦爲翰林應奉以才選充會同館副使兼接待使扈駕上京賦應制詩二篇寓規諷意世祖顧和禮霍孫曰有才如此何可不用十二年升翰林修撰十四年出僉河北河南道按察司事十六年入爲翰林直學士以州郡校官多不職建議定銓選之法二十三年遷翰林學士帝屢召至榻前面諭詔旨具草以進輒稱善二十八年尙書省罷復立中書省帝勵精圖治急於擇相一日召入便殿諭

之曰朕欲命卿執政何如復謝不足勝任帝謂侍臣曰書生識義理存謙讓是也勿強出爲浙西道廉訪使先是姦臣桑葛當國嘗有旨命翰林撰桑葛輔政碑桑葛既敗詔有司踣其碑復亦坐是免官三十一年成宗卽位以舊臣詔入朝除集賢學士疏言京師宜首建宣聖廟學定用釋奠雅樂其後詔賜孔林灑掃二十八戶祀田五千畝皆復之請也三年因星變又上疏言定律令頒封贈增俸給通調內外官且曰古者刑不上大夫今郡守以徵租受杖非所以厲廉隅江南公田租重宜減以貸貧民後多采用大德元年拜翰林學士承旨十一年春武宗踐阼復首陳三事曰惜名器明賞罰擇人材言皆剴切未幾遙授平章政事餘如故復力辭不許上疏乞骸骨詔從其請給半俸終養時仁宗居東宮賜以重錦俾公卿祖道都門外及卽位遣使召復復以疾辭卒諡文康有靖軒集五十卷

### 揭傒斯

揭傒斯字曼碩龍興富州人父來成宋鄉貢進士傒斯幼受庭訓會貧攻苦大德閒出游湘漢湖南帥趙淇暨程鉅夫盧摯先後咸器重之鉅夫因妻以從妹延祐初鉅夫與摯列薦於朝特授翰林國史院編修官時平章李孟監修國史讀其所撰功臣列傳嘆曰是謂史筆他人直謄吏牘爾傒斯久在翰林熟於朝廷掌故天庥初開奎章閣首擢授經郎以教勳戚大臣子孫兼預修經世大典文宗時幸閣中有所咨訪奏對稱旨恆字之而不名每中書奏用儒臣必問曰其材何如揭曼碩閒出其所上太平政要策以

示臺臣且屢稱其純實欲進用之會晏駕而止順帝元統  
初詔對便殿慰諭良久屢遷翰林待制集賢學士先是儒  
學官赴吏部銓者必移集賢考校其所業集賢下國子監  
監下博士吏牘淹稽動踰累月俟斯請更其法以事付本  
院屬官人甚便之奉旨祠北嶽濟瀆南鎮便道西還時太  
師柏顏當國屢促其還朝俟斯引疾固辭旣而柏顏敗擢  
奎章閣俱奉學士乃卽日就道未至改翰林直學士及開  
經筵再遷侍講學士同知經筵事經筵無專官曰領曰知  
多宰執大臣凡微辭奧義皆屬俟斯訂定而後進務寓獻  
替以裨治道至正三年年七十乞致仕尋復召還求去不  
許命丞相脫脫及執政大臣面諭毋行俟斯曰使俟斯有  
一得之獻諸公用其言而天下蒙其利雖死於此何憾不

元史卷四十七 列傳

三

然何益之有丞相因問方今致治何先俟斯曰儲材爲先  
養之於位望未隆之時用之於歷試諸艱之後則無失材  
無廢事一日集議朝堂俟斯抗言當兼行新舊銅錢以救  
鈔法之敝持之甚堅丞相雖稱其不阿而言竟莫用預修  
遼金宋三史爲總裁官四年遼史成有旨獎諭仍督早成  
金宋二史俟斯留宿史館朝夕不敢休服無重裘因得寒  
疾七日卒帝聞嗟悼賜楮幣萬緡仍給驛舟護喪歸江南  
六年贈豫章郡公諡文安俟斯少處窮約能使親忘其貧  
暨祿入稍踰於前慨親之不逮也故一生清苦至老不渝  
其爲授經郎時入直多步行同僚謀爲貴馬聞之卽自置  
一騎旋復賣去立朝雖居散地而急於薦士揚人之善惟  
恐不及聞墨吏病民者則深疾焉嘗白免富州金課鄉里

至今德之爲文章敘事嚴整簡當與姚燧並冠一代朝廷大典冊及元勳碑碣咸出其手而詩則清揚婉麗與其文如出二人虞集自負其詩爲漢庭老吏而古文不敢傲揭有文安集若干卷子泐取知名

歐陽玄

歐陽玄字原功其先家廬陵與文忠公修同所自出至曾大父新始遷居瀏陽登延祐二年進士授岳州路平江州同知調太平路蕪湖縣尹在縣多平反疑獄豪右之奴良民者免之貢賦徵發及時蝗不入境改武岡縣尹縣控制溪洞蠻獠雜居撫字稍乖輒弄兵犯順玄至踰月赤水大清兩洞聚眾相攻殺即日單騎從二人徑抵其地諭之獠人熟玄名棄兵仗羅拜馬首曰我曹非不畏法緣訴其事

元史卷四十七 列傳

十四

於縣縣官不爲直反令繇役掊克之情有弗堪乃發憤就死耳玄諭以禍福理其曲直獠人遂安致和元年屢遷翰林待制兼國史院編修官時當兵興玄領印攝院事日直內庭參決機務凡遠近調發制詔書檄暨改元天祿郊廟建后立儲肆赦之文皆經撰述復條時政數十事實封以聞多推行之明年初置奎章閣學士院又置藝文監隸焉皆選清望官居之文宗親署玄爲藝文少監奉詔纂修經世大典元統元年拜翰林直學士編修四朝實錄俄兼國子祭酒後至元五年拜翰林學士懇辭去位不允免其行朝賀禮至正改元更張朝政事有不便者集議廷中玄極言無隱科日之復沮者尤眾玄尤力爭之詔修遼金宋三史召爲總裁官發凡舉例史官中有議論不公者玄不以

口舌爭俟其呈稟援筆竄定之統系自正至於論贊表奏皆玄屬筆五年拜翰林學士承旨已而乞致仕復不允御史臺奏除福建廉訪使行次浙西疾作乃上休致之請復拜翰林學士承旨玄屢力辭不獲命奉勅定國律尋懇乞致仕將行復降旨不允十四年汝潁盜起蔓延南北州縣幾無完城玄獻招捕竝行之策請信賞罰聯聲勢寬脅從擢謀士精間諜凡千餘言當時不能用十七年春乞致仕以中原道梗欲由蜀還鄉帝復不允時將大赦天下宣赴內府命肩輿至延春閣是歲十二月卒年八十五追封楚國公諡曰文玄性度雍容含宏縝密處己儉約爲政廉平歷官四十餘年屢主文衡兩知貢舉及讀卷官凡宗廟朝廷鴻文大冊播告萬方制詔多出其手金縢上尊之賜幾

元史卷四十七 列傳

十五

無虛歲海內名山大川釋老之宮王公貴人墓隧之碑得其文辭以爲榮奉詔撰河平碑又爲至正河防記萬言爲歷代河渠志所未有有圭齋文集若干卷行於世危素狀其行事

見悅學齋集

元明善

元明善字復初大名清河人其先蓋拓拔魏之裔居清河者至明善四世矣治經皆有師法而尤深春秋浙東使者薦爲安豐建寧兩學正辟掾行樞密院時董士選僉院事實寶友之及士選遷江西左丞又辟爲省掾會贛州賊劉貴反明善從士選將兵討之擒賊三百人明善議緩誣誤得全活者百三十人一日將佐白宐多戮俘獲及尸一切

死者以張軍聲明善固爭旣又得賊所書贛吉民丁十萬



於籍者有司喜欲滋蔓爲利明善請火其籍以滅迹二郡遂安仁宗居東宮首擢太子文學卽位改翰林待制與修成宗順宗實錄遷翰林直學士詔節尙書經文譯其關政要者以進明善舉宋忠臣文天祥子集賢直學士文陞同譯潤許之書成每奏一篇帝必稱善曰二帝三王之道非卿莫聞也興聖太后旣受尊號廷臣請因肆赦明善曰數赦非善人之福宥過可也奉旨出振山東河南饑時彭城下邳諸州連數十驛民餓馬斃而官無振貸明善以便宐出鈔萬二千錠給之還修武宗實錄又遷翰林侍講學士預議科舉服色等事延祐二年始會試天下進士明善首充考試官及廷試又爲讀卷官所取士後多爲名臣改禮部尙書正孔氏宗法以宣聖五十五世孫思晦襲封衍聖

元史卷四十七 列傳

六

公事上制可之擢參議中書省事會朝廷遣蒙古大臣一員使交趾明善副之將還國王贈以金幣蒙古大臣受之明善固辭其王曰彼使臣已受矣公獨何爲明善曰彼所以受者安小國之心我所以不受者全大國之體國王歎服尋遷翰林學士修仁宗實錄至治二年卒秦定間追封清河郡公諡文敏有清河集行世初在江西金陵每與虞集劇論以相切劘明善言集治諸經惟主宋儒而於漢以來先儒傳註攷之未博集亦言凡爲文辭得所欲言而止必如明善所云若雷霆之震驚鬼神之靈變然後可非性情之正也二人初相得甚驩至京師乃復不能相下董士選之自中臺行省江浙也二人者俱送出都門外集早還士選約明善復送至二十里外入邸舍同飲乃舉酒屬明

善曰士選以功臣子出入臺省無補國家惟求得佳士數人爲朝廷用之如復初與伯生他日必皆光顯然恐不免爲人構間復初中原人也仕必當道伯生南人將爲復初擢折今爲我飲此酒慎勿兩賢相戾明善跪而醺之起立言曰誠如公言請公再賜二卮誓推此心以栽培善類終身誓不敢忘乃再飲而別遂與集驩如初其後明善每作文必招集就正之集輒泚筆刪百十字而文益精當馬祖常碑其神道

謝端字敬德蜀之遂寧人宋末蜀士多避兵江陵因家焉端弱冠與尙書宋本同師又同教授江陵城中以文學齊名時號謝宋史杠宣慰荆南數加延禮薦之姚樞樞薦署校官不報延祐五年擢進士乙科授潭州路同知湘陰州

元史卷四十七 列傳

七

事歲滿入爲國子博士遷太常博士盜入太廟失第八室金主坐罷去端禮官非典守不當坐亦不辨尋除翰林修撰再遷翰林直學士端治湘陰時猾吏束手不敢舞文法豪民無賴者遠避去部使者行部旁郡滯訟皆委端讞端剖決如流績譽籍然其文章嚴謹有法寧約近瘠無奢滋駁居翰林久至順元統以來國家大制冊多出其手預修文宗明宗寧宗三朝實錄及累朝功臣列傳時稱其有史才初文宗建奎章閣蒐羅中外才俊置其中嘗語阿榮曰當今文學之士惟未識謝端無何文宗崩竟不及用端又與趙郡蘇天爵同著正統論辨金宋正統甚悉至元六年卒年六十一元世蜀士以文章名者曰虞集而謝端次之

以上舊史皆在

列傳今移入

文苑二

陳孚

馮子振

陳孚字剛中台州臨海人至元中孚以布衣上大統賦江浙行省聞於朝署上蔡書院山長考滿謁選京師二十九年世祖命梁曾以吏部尚書再使安南選南士爲介朝臣薦孚博學有氣節調翰林國史院編修官攝禮部郎中爲曾副陛辭賜五品服佩金符以行三十年正月至安南世子陳日燁以憂制不出郊遣陪臣來迎又不由陽明中門入曾與孚回館致書詰日燁以不庭及不出郊迎詔之罪往復三書宣布天子威德辭直氣壯皆孚筆也其所贈孚悉卻之詳見梁曾傳中使還除翰林待制兼國史院編修官帝方欲實之要地而廷臣以孚南人且尚氣頗忌之

元史卷四十七列傳

太

遂除建德路總管府治中再移衢州台州所至多著善政大德七年詔遣奉使宣撫循行諸道時台州旱饑道殣相望江浙行省檄浙東元帥脫歡察爾發粟振濟而脫歡察爾怙勢立威不恤民隱驅脅有司動實重刑孚遂詣宣撫使愬其不法蠹民事十九條按實坐罪亟發倉振民賴全活者眾孚亦以此致疾卒於家年六十四孚天材過人性任俠不羈其詩文任意疾成不事雕斲有文集行於世攸州馮子振其豪俊與孚略同孚自以爲不及子振於書無所不記其爲文酒酣耳熱命侍吏二三人潤筆以俟子振據案疾書隨紙數多寘頃刻輒盡事料醲郁美如簇錦律之法度未免乖刺人亦以此少之

范梈

范梈字亨父一字德機清江人家貧早孤母熊氏守志教之梈天資穎異所誦讀輒記憶雖癯然清寒若不勝衣於流俗中克自樹立無苟賤意居則固窮守節竭力以養親出則假陰陽之技以給旅食耽詩工文用力精深人罕知者與虞集友善年三十六始客京師中丞董士選延之家塾以朝臣薦爲翰林院編修官秩滿御史臺擢海南海北道廉訪司照磨巡歷遐僻所至興學雪冤遷江西湖東長吏素稱嚴明於僚屬中獨敬異之選充翰林供奉御史臺又改擢福建閩海道知事閩俗素污文繡局取良家子爲繡工無別尤甚梈作歌詩一篇述其敝廉訪使取以上聞皆罷遣之未幾移疾歸故里天祿二年授湖南嶺北道廉訪司經歷以養親辭明年卒年五十九所著詩文與虞集

元史卷四十七 列傳

九

楊載揭傒斯齊名梈居官廉正不可干以私疏食飲水泊如也吳澄稱爲特立獨行之士云

楊載

楊剛中

李桓

劉詵

龍仁夫

劉岳申

楊載字仲弘其先居建之浦城後徙杭因爲杭人年四十一不仕戶部賈國瑛數薦於朝以布衣召爲翰林國史院編修官與修武宗實錄延祐初仁宗以科目取士載首應詔遂登進士第授饒州路同知浮梁州事遷寧國路總管府推官旋卒初吳興趙孟頫在翰林得載所爲文極推重之由是有名其文跌宕有奇氣詩宗漢魏盛唐一洗宋季之陋虞集詩自負爲漢庭老吏而稱載詩如百戰健兒云建康之上元有楊剛中字志行自幼厲志操及爲江東憲府照磨風采凜凜其文奇奧簡澀力矯凡俗爲元明善歎賞

仕至翰林待制而卒有霜月集行世其甥李桓字晉仲同郡人由鄉貢進士累遷江浙儒學副提舉亦以文鳴江東載與剛中同輩行而桓則稍後云

劉詵字桂翁吉安之廬陵人少有文名江南行御史臺屢以教官館職遺逸薦皆不報詩文曰桂隱集桂隱詵所號也至正十年卒年八十三同郡龍仁夫字觀復劉岳申字高仲其文學皆與詵齊名有集行世而仁夫之文尤奇逸流麗所著周易多發前儒所未發岳申用薦爲遼陽儒學副提舉仁夫江浙儒學副提舉皆不就

陳旅

程文 陳釋曾 鄭杓 柯九思 李孝光

陳旅字眾仲興化莆田人受學於溫陵傅古直用薦爲閩海儒學官適御史中丞馬祖常使泉南一見奇之謂旅曰

元史卷四十七 列傳

三

子館閣器也胡爲畱滯於此因勉游京師既至翰林侍講學士虞集見其所爲文慨然歎曰我老將休付子斯文矣卽延至館中朝夕講習自謂得起子之助與祖常交口游譽於諸公間中書平章政事趙世延又力薦之除國子助教居三年考滿諸生不忍其去請於朝再任焉元統二年出爲江浙儒學副提舉至元四年入爲應奉翰林文字至正元年遷國子監丞卒年五十有六旅文典雅峻潔不徇世好有集十四卷每感虞集爲知己其在浙江時集歸田已數載歲且大比請於行省參政字朮魯狃親奉書幣請集主文鄉闈欲爲問候計乃衝冒炎暑千里訪集於臨川畱旬日而別一日集夢旅舉杯相向旣而聞旅卒集淚悼之同時有程文陳繹曾者皆爲集所稱文字以文徽州人

仕至禮部員外郎繹曾字伯敷處州人爲人口吃而精敏異常諸經註疏多能成誦文辭彪炳官至國子助教二人皆與旅相伯仲又有鄭杓者字子經羅源人秦定中辟南安儒學教諭與陳旅爲文字交著衍極五篇衍極記載三篇其書自蒼頡迄蒙古凡古人籀篆無所不備宣撫使齊伯亨采而上之作衍極堂以藏其書

柯九思字敬仲台州仙居人父謙由文學掾爲江浙提舉九思以蔭補華亭尉不就文宗知之於潛邸及卽位擢典瑞院都事置奎章閣特授監書博士賜牙章得通籍禁署以謙善教子錫碑名訓忠敕虞集爲文旌之寵顧曰隆漸招物議九思乘閒請曰臣以文藝末技遭逢聖明孤危見忌乞補外以自効上曰朕在汝復何憂未幾文宗上賓因

元史卷四十七 列傳

三

流寓中吳以卒九思善寫竹石始得筆法於文同嘗自謂寫翰用篆法枝用草書法寫葉用八分生意飛動有龍翔鳳翥之狀故四方大丈夫士爭寶愛之又善鑒識金石鼎彝之器時吳人陸友號爲博物亦嘆爲不及有任齋詩集四

卷虞集陳旅爲之序

見歷代小史

李孝光字季和溫州樂清人博學好古隱居鴈蕩山五峯下四方之士遠來受學泰不華師事之南行臺監察御史闔辭屢薦居館閣至正七年詔徵隱士以祕書監著作郎召與完者圖執禮哈琅董立同應詔赴京師見帝於宣文閣進孝經圖說賜上尊明年遷祕書監丞卒於官年五十三孝光以文章負名當世非先秦兩漢語弗以措辭有文

張翥

張翥字仲舉晉寧人少負才雋豪放不羈好蹴踘喜音樂不屑家計一旦翻然易業閉門讀書受業於李存存字安仁傳陸九淵之學翥從聞道德性命之說未幾畱杭又從仇遠學詩已而薄游維揚學者及門甚眾後至元末同郡傅巖起居中書薦翥隱逸至正初召爲國子助教分教上都生尋退居淮東會朝廷修遼金宋三史起爲翰林國史院編修官屢遷侍講學士兼祭酒翥勤於誘掖後進絕去崖岸不徒以師道自尊學者皆樂親之嘗奉旨詣中書集議時政眾論蜂起翥獨默然丞相朔思監詰之對曰諸人之議皆是也但事勢有緩急施行有先後在丞相所決耳俄除集賢學士旋以翰林學士承旨致仕字羅帖木爾之

元史卷四十七列傳

三

入京師也命翥草詔削奪擴廓官爵且發兵討之翥毅然不從乃命他學士爲之字羅亦不怨也及字羅既誅詔給全俸終其身二十八年卒年八十有二翥於詩尤工近體長短句文不如詩而每以文自負然未嘗構思特任意屬筆而已善諧謔談吐輒令人失笑一座盡傾國亡後其遺稿不傳僅存律詩樂府三卷

舊史在列傳今移入

顧輝

顧輝字德潤鄞縣人其大父應春鄉貢進士父學海字叔川皆名士輝幼承家學甫十歲卽善屬文郡博士俞希魯欲以神童貢辭不就既長大肆力於經傳卓然欲以事功自見會無有薦之者乃閉關卻掃喟然嘆曰吾身不遇矣殆將立言已乎惟經以載道史以紀事古先哲王所藉以

牖斯民者也自是默索精思晝夜孜孜垂三十年著釋圖  
一說約六十三圖徽二十一希言二十四事刻六十二治  
要十八體卦八解八辯十二議二十四傳七記論序文銘  
各三雜著十八賦六騷十九雜詩三百二十一合三十卷  
分爲前後外三集通謂之守齋類彙宋濂爲之序

見文憲集

### 周伯琦

周伯琦字伯溫饒州人父應極至大閒以翰林待制爲皇  
太子說書日侍英邸仁宗卽位遷集賢待制終池州路同  
知總管府事伯琦以蔭授南海縣主簿三轉爲翰林修撰  
至正元年爲宣文閣授經郎敎戚里大臣子弟每進講輒  
稱旨日被顧問帝以伯琦工書法命篆宣文閣寶仍題扁  
宣文閣及摹王羲之所書蘭亭序智永所書千文刻石閣

元史卷四十七列傳

五

中嘗字之而不名十二年有旨命南士皆得居省臺伯琦  
遂與貢師泰同擢監察御史時御史大夫耶先帖木爾以  
失律喪師爲陝西行臺監察御史劉希曾等十人所劾伯  
琦反劾希曾等越分干譽希曾等皆坐左遷由是不爲公  
論所與十四年爲江夏廉訪使長槍鎖南班陷寧國伯琦  
與僚佐倉皇出見之尋遁走至杭州改浙西廉訪使江南  
行臺監察御史余觀糾劾伯琦失陷寧國宐正其罪十七  
年江浙行省丞相達識承制假伯琦參知政事招諭平江  
張士誠士誠旣降江南行臺監察御史亦辯釋伯琦罪除  
同知太常禮儀院事士誠畱之未行拜江浙行省左丞於  
是畱平江者十餘年士誠旣滅伯琦乃得歸鄱陽尋卒伯  
琦儀觀溫雅遭時多艱善於自保博學工文尤以隸篆眞



草擅名當時嘗著六書正譌說文字原二書又有詩文彙

若干卷

自列傳  
移入

李河

李河字漑之滕州人少以文受知姚燧薦授翰林國史院編修官轉太常博士拜住爲丞相聞河名擢監修國史長史泰定初除翰林待制以葬親辭歸天厯初文宗方開奎章閣延天下知名士充學士員河數進見奏對稱旨特授奎章閣承制學士河旣被知遇乃著書曰輔治篇以進命預朝廷大議同修經世大典謁告歸復除翰林直學士稱疾不起河骨清神朗峩冠袞衣望之如圖畫中人爲文揮灑天放每去官後歷游匡廬王屋少室諸山畱連久之乃去僑居濟南有湖山花竹之勝構亭其間文宗嘗敕虞集

元史卷四十七 列傳

五

記之河尤善書自篆隸眞草皆見重於世卒年五十九有文集四十卷

自列傳  
移文

楊維禎

丁鶴年

楊維禎字廉夫諸暨人泰定初進士署天台尹罷去張士誠據浙西累使求致不能屈且撰五論反復告以順逆成敗之說識者韙之生平氣度高曠喜戴華陽巾披羽衣周游山水閒以聲樂自隨早歲居吳山鐵冶築萬卷樓轆轤傳食讀書其上者五年故以鐵崖自號已得鐵笛於湘江吹之亦號鐵笛子文辭非秦漢弗之學久與俱化晚年築蓬臺於松江東南才俊士投贄求文者無虛日當疾亟撰歸全堂記頃刻立就擲筆而逝著有四書一貫錄五經鑰鍵春秋透天關禮經約歷代史鉞二百卷詩有瓊臺曲洞

庭雲閒雜吟五十卷

丁鶴年以字行其先西域人父職馬祿丁徙居武昌因以  
丁爲氏年十七通詩書禮經至正間淮兵渡江襲武昌鶴  
年奉母行備歷艱阻聞從兄吉雅謨丁爲定海令徒步往  
依焉省臺交薦凡九上皆不就旣而方國珍據浙東鶴年  
淡匿海島賣藥以自給凡憂君憂國之念皆發之詩歌著  
有海巢集

元史卷四十七 列傳

三

良吏

譚澄字彥清德興懷來人父資榮金末爲交城令元兵下河朔以縣來附未幾賜虎符行元帥府事從攻汴有功年四十移病舉弟資用自代資用卒澄襲職澄幼穎敏爲交城令時年十九豪民有持吏短長爲奸者察得其主名皆以法治之歲乙未籍民戶有司多以浮客占籍及征賦逃竄殆盡官爲稱貸積息數倍民無以償澄入覲因中書耶律楚材面陳其害太宗惻然爲免其逋負其民間私債定令積年雖久息惟取倍而止亡民能歸者復三年詔下公私便之壬子復大籍其民澄盡削交城之不上著者賦以時集甲寅世祖還自大理澄進見畱藩府凡遣使必以澄

元史卷四十八 列傳

一

偕而以其弟山阜代令交城中統元年帝卽位擢懷孟路總管俄賜金虎符歲旱令民鑿唐溫渠引沁水以溉田教之種植地無遺利民用不饑至元二年遷河南路總管改平灤路總管七年入爲司農少卿俄出爲京兆總管居一年改陝西四川道按察使建言不孝有三無後爲大宐令民年四十無子聽取妾以爲宗祀計朝廷從之遂著爲令嚴忠範守成都爲宋將咎萬壽所敗退保子城帝命澄代之至則葬暴骸修焚室振饑貧集逋亡民心稍安會西南夷羅羅斯內附帝以撫新國宐擇文武全才遂以澄爲副都元帥同知宣慰使司事比至以疾卒年五十八世祖嘗與太保劉秉忠論一時牧守秉忠曰若邢之張耕懷之譚澄何憂不治哉游顯宣撫大名嘗爲諸路總管求虎符澄

至中書辭曰皇上不識譚澄邪乃爲顯所舉中書特爲去之其介如此子克修歷湖北河南陝西三道按察使

許楫字公度太原忻州人幼從元好問學年十五以儒生中詞賦選河東宣撫司舉楫賢良方正孝廉至京師平章王文統命爲中書省掾以不任簿書辭改知印丞相安童左丞許衡深器重之一日從省臣立殿下世祖見其美髯魁偉問曰汝秀才邪楫頓首曰臣學秀才耳未敢自謂秀才也帝善其對授中書省架閣庫管勾兼承發司事未幾立大司農司以楫爲勸農副使時商挺爲安西王相遇於途楫因言京兆之西荒野數千頃宋金皆嘗置屯如募民屯田耕種得穀可給王府之需挺以其言入奏從之三年屯成果獲其利尋佩金符爲陝西道勸農使至元十三年

元史卷四十八 列傳

二

宋平帝命平章廉希憲行中書於荆南府以楫爲左右司員外郎荆南父老與金帛求見楫曰汝等已爲大元民矣今置吏以撫汝輩奚用金帛求見爲明年擢嶺北湖南按察副使武岡富民有毆死出征軍人者陰以家財之半誘其佃戶款服楫審得其情罪主者人服其明改江西道按察副使行省命招討郭昂討叛賊董旗兵士俘掠甚眾楫詢究得良民六百口遣還鄉里授徽州總管桑葛立尙書省會計天下錢糧參政忻都戶部尙書王巨濟倚勢剝削遣吏徵徽州民鈔多輸二千錠巨濟怒其少欲更益千錠楫曰公欲百姓死邪生邪如欲其死雖萬錠可徵也巨濟意解州賴以免二十四年授太平總管謝事二年卒年

田滋字榮甫開封人至元二年由汴梁路總管府知事入爲御史臺掾十二年拜監察御史十三年宋平建言江南新附民情未安加以官吏侵漁宜立御史臺以鎮之詔從其言遂拜行臺侍御史歷兩淮鹽運使河南路總管大德二年遷浙西廉訪使有縣尹張或者被誣以賊獄成滋審之但俛首泣而不語滋以爲疑明日齋沐詣城隍司禱曰張或坐事有冤狀願神相滋明其誣廟令老人進曰曩有王成五人同持誓狀到祠焚禱火未滅而去於燼中得其遺稟藏於壁閒豈其人邪視之果然明日詣憲司詰成等不服因出火中誓狀示之皆驚愕服辜或得釋十年改濟南路總管尋拜陝西行省參政時陝西不雨三年滋道過西嶽禱於神到官果大雨因開倉以麥五千石給小民之無種者俾來歲收成以償官民大悅未幾以疾卒追封開封郡公諡莊肅

元史卷四十八 列傳

三

卜天璋字君章洛陽人幼穎悟長負直氣讀書史識成敗大體至元中爲南京府史時河北饑民數萬人集河上欲南徙有詔令民復業勿渡河眾洶洶不可止天璋慮生變勸總管張國寶聽其渡從之遂以無事河南按察副使程思廉察其賢辟爲憲府長史聲聞益著後爲中臺掾有侍御史倚勢貪橫御史發其贓天璋主文牘未及奏顧爲所譖俱拘內廷御史對食悲哽天璋問故御史曰吾老唯一女心憐之間吾繫不食數日矣是以悲耳天璋曰死職義也柰何爲兒女子泣邪御史慚謝俄見原免大德四年爲工部主事五年以薦授都事秩滿當代樞密奏畱之特以

代者爲增員武宗時遷部郎值盜賊充斥朝議有犯者并家屬咸服青衣中以別平民天璋曰赭衣塞路秦敝政也尙足法邪相悟而止尙書省臣得罪仁宗召天璋入見與聖太后在坐帝指曰此不貪賄卜天璋也因問今何官對曰臣待罪刑部郎中復問誰所薦者對曰臣不才誤蒙擢用帝曰先朝以謝仲和爲尙書卿爲郎中皆朕親薦也宜奉職勿怠賜酒及錦衣三襲後被命治反獄帝顧左右曰天璋廉慎人也必得其情及讞定獄賴不冤皇慶初知歸德府劭農興學復河渠河患遂弭時羣盜據要津商旅不通天璋禽百數人悉磔以徇盜爲止息升浙西道廉訪副使以更田制改饒州路總管天璋聽民自實事無苛擾版籍爲清縣以饑告卽抗論發廩粟振之火延饒之東門天

元史卷四十八 列傳

四

璋具衣冠向火拜勢遂熄以治行第一聞遷廣東廉訪使初豪民瀕海築堰專商舶以射利歷任得賄置不問天璋至發卒決去之嶺南地素無冰至是有之人謂天璋政化所致尋乞致仕天璋二年蜀兵起荆楚大震復拜山南廉訪使人意其老必不行矣天璋曰國步方艱吾年八十懼弗獲死所耳敢避難乎遂行至則厲風紀清吏治州郡肅然會詔三品官言時政得失因列上二十事凡萬餘言曰之曰中興濟治策皆中時敝因自引去旣歸沐以餘祿施其族黨家無儋石處之晏如至順二年卒贈禮部尙書河南郡侯諡正獻

楊奐字煥然乾州奉天人母嘗夢東南日光射其身旁一神人以筆授之已而奐生其父以爲文明之象因名曰奐

年十一母歿哀毀如成人金末舉進士不中歸教授鄉里  
歲癸巳北渡冠氏帥趙壽之延致待以師友之禮東平嚴  
實聞其名數問行藏奩終不一詣戊戌太宗詔宣德稅課  
使劉用之試諸道進士奩就試東平兩中賦論第一從監  
試官北上謁中書耶律楚材楚材薦授河南路徵收課稅  
所長官兼廉訪使奩將行言於楚材河南兵荒之後遺民  
無幾烹鮮之喻正在今日急而擾之糜爛必矣願假以歲  
月使得撫摩瘡痍以爲朝廷愛養基本楚材是之奩旣至  
禮名士訪得失約束簡易按行境內親問監務月課幾何  
難易若何有以增額言者輒責其剝下欺上卽減元額四  
之一公私便之不踰月政成時論翕然在官十年乃請老  
於燕之行臺壬子世祖在潛邸驛召奩參議京兆宣撫司

元史卷四十八 列傳

五

事累上書得請而歸乙卯疾篤處置後事如平時引觴大  
笑而卒年七十賜諡文憲奩博覽強記爲文務去陳言不  
治生產家無十金之業而喜周人急揚人善所著有還山  
集六十卷大興近鑑三卷正統書六十卷行於世

自列傳  
移入

韓鏞字伯高濟南人延祐五年中進士第授翰林國史院

編修官尋遷集賢都事泰定四年轉國子博士俄拜監察

御史當時由進士入官者僅百之一由吏致位顯要者常

十之九帝欲以中書參議傅巖起爲吏部尙書鏞上言吏

部掌天下銓衡巖起從吏入官烏足盡知天下賢才況尙

書秩三品巖起累官四品耳於法亦不得遷制可其奏天

祿元年除僉浙西廉訪司事擊姦暴黜貪墨而特舉烏程

縣尹干文傳治行爲諸縣取所至郡縣肅然二年轉江浙

財賦副總管至順元年除國子司業尋遷南行臺治書侍  
御史順帝初歷僉宣徽及樞密院事至正二年除翰林侍  
講學士既而拜侍御史以剛介爲時所忌言事者劾其賊  
私乃罷去五年臺臣辨其誣遂復起參議中書省事七年  
朝廷慎選守令參政魏中立言於帝當今必欲得賢守令  
無如鏞者乃授饒州路總管饒俗尙鬼有覺山廟自昔爲  
妖以禍福人盜賊事之尤至鏞至卽徹祠宇沈其土偶盡  
毀境內淫祠人初駭終服又求宿儒爲五經師每政暇必  
延見諸生講討經義由是人力於學科第冠於他郡鏞自  
奉澹泊僚屬化之先是朝使至外郡者官府奉之甚侈不  
厭所欲卽騰謗於朝惟使饒者鏞延之郡舍中供以糲飯  
退皆無有後言其後有旨以織幣脆薄遣使笞行省臣及

元史卷四十八 列傳

六

諸郡長吏獨鏞無預十年拜中書參政十一年丞相脫脫  
在位而龔伯遂輩方用事朝政悉議更張鏞有言不見聽  
人或以鏞優於治郡而執政非其所長遂出爲甘肅行省  
參政及脫脫罷用事者悉誅而鏞又獨免禍乃遷西行臺  
中丞歿於官

袁裕字仲寬聊城人中統初辟中書右司掾始建言給重  
囚衣糧醫藥毆人至死者免籍其孥產止令出焚瘞錢後  
著爲令順天路民王住兒因鬪誤殺人其母年七十言於  
朝曰妾寡且老恃此兒以爲生兒死則妾亦死矣裕言於  
執政始立誤殺畱養之令南京總管劉克興掠良民爲奴  
隸後以矯制獲罪當籍孥產之半裕言於中書止籍其家  
奴隸得復爲民者數百至元六年遷開封府判官洧川縣



達魯花赤貪暴盛夏役民捕蝗禁不得飲水民不勝忿擊之而斃有司當以大逆置極刑者七人連坐者五十餘人裕曰達魯花赤自犯眾怒而死安可歸罪於民議誅首惡者一人餘各杖之有差部使者錄囚至縣疑其太寬裕辨之益力遂陳其事狀於中書刑曹竟從裕議八年授西夏中興等路新民安撫副使時徙鄂民萬餘於西夏有司雖與廩倉而流離顛沛猶多裕與安撫使獨吉請於朝計丁給地立三屯使耕以自養又言西夏羌渾雜居驅良莫辨宜驗已有從良書者則爲良民從之得八千餘人官給牛具使力田爲農十九年授順德路總管郡有鐵冶提舉張鑑無子買妾其妻妒而殺之裕捕其妻訊之服辜二十一年卒於官

元史卷四十八 列傳

七

鄧文原字善之一字匪石緜州人父漳徙錢塘文原年十

五通春秋在宋時以流寓試浙西轉運司魁四川土

道碑謂文原中宋撰神進士與此不符至元中辟爲杭州路儒學正大德中擢

應奉翰林文字升修撰授江浙儒學提舉皇慶初召爲國

子司業請更學校之政當路重改作論不合移病去科舉

制行文原校文江浙慮士守舊習大書朱熹貢舉私議揭

於門延祐五年僉江南浙西道廉訪司事平江僧有誣其

府判官理熙以贓者熙誣服文原行部按問得實杖僧而

釋熙吳興民夜歸巡邏者執之繫亭下其人遁去有追及

之者刺其脅仆地明旦家人得之以歸比死其兄問殺汝

者何如人曰白帽青衣長身者也其兄愬於官有司問直

巡邏初更者曰張福執之使服焉械繫三年文原駁之曰

福身不滿六尺未見其長也刃傷右脅而福素用左手傷  
宜在左何右傷也鞠之果得真殺人者而釋福桐廬人戴  
汝惟家被盜有司得盜獄成送郡夜有焚戴氏廬者而不  
知汝惟所之文原曰此必有故也訪得其妻葉與弟謀殺  
狀而於水涯樹下得屍與漬血斧俱在焉人以爲神六年  
移江東道徽寧國廣德三郡歲入茶課鈔三千錠後增至  
十八萬錠竭山谷所產不能充其半餘皆鑿空取諸民間  
歲以爲常而轉運司得專制有司凡五品官以下皆杖決  
州縣莫敢如何文原請罷其專司俾郡縣領之不報徽民  
謝蘭家僮汪姓者死蘭姪回賂汪族人誣蘭殺之蘭誣服  
文原錄得其情釋之而反坐回時久旱不雨獄決乃雨至  
治二年召爲集賢直學士地震詔議弭災之道文原請決

元史卷四十八 列傳

八

滯囚振饑民竝申前議請罷榷茶轉運司又不報明年兼  
國子祭酒秦定元年兼經筵官以疾乞致仕再召不起文  
原少貧客京師有一書生疾篤取囊中金屬之以歸其親  
既死而同舍生竊金去文原代償終身不以語人有文集  
若干卷內制集若干卷至順五年制贈江浙行省參政諡  
文肅吳澄碑其神道

以上三傳皆  
自列傳移入

耶律伯堅字壽之桓州人氣豪俠喜與名士游用薦舉入  
官爲工部主事至元九年轉保定路清苑縣尹初安肅州  
苦徐水爲害訴於大司農司大司農欲奪水故道導水使  
東東則清苑境也地勢不利伯堅陳其形勢圖其利害要  
大司農司官及郡守行視可否事遂得已縣西有塘水溉  
民田甚廣勢家據以爲磴民訴失利伯堅命毀磴決水注

田許以溉田餘月乃得堰水置礎仍以其事聞於省部著爲令縣居南北衝歲爲親王大官治供帳明年復徹而新之其費不貲伯堅築館代帳其做遂絕凡賦役有重於他縣者輒詣府力爭之在清苑四年擢恩州同知去民立石頌之

段直字正卿澤州晉城人金季宣宗南遷汴河北河東山東盜賊充斥直聚其鄉黨族屬結壘自保元兵略地晉城直以其眾歸之幕府承制署直潞州元帥府右監軍其後論功行賞分土世守命直佩金符爲澤州長官澤民多避兵未還者直命籍其田廬於親戚鄰人之戶俟業主至析而歸之逃民聞之多來還素無產者則出粟振之爲他郡所俘掠者出財購之以兵死而暴露者收瘞之未幾澤爲樂土修學宮割田千畝置書萬卷迎儒士李俊民爲師不五六年士子以通經被選者百二十人在官二十年朝廷特命提舉本州學校事未拜而卒

元史卷四十八 列傳

九

諳都刺字瑞芝凱烈氏祖阿思蘭嘗從大將阿朮伐宋仕至冀寧路達魯花赤子孫因其名蘭遂以蘭爲氏諳都刺通經史兼習諸國語成宗時爲翰林院札爾里赤職書制誥會有旨命書藩王添力聖旨諳都刺曰此旨非惟有虧國體行且爲民殃矣帝聞之謂近臣曰小吏如此真難得也事乃止尋授應奉翰林文字凡蒙古傳記多所校正除遼州達魯花赤以政聞賜上尊名幣至順元年遷襄陽路達魯花赤山西大饑河南行省恐流民入境爲變檄守武關諳都刺驗其良民輒聽度關吏恐違上命諳都刺曰吾

防姦耳非仇良民也既又煑粥以食之所活數萬人襄陽城臨漢水歲有水患爲築長堤城遂無虞元統二年除益都路總管俗頗悍黠而諳都刺務興學校以平易治之有馬賊白晝劫人久不能捕諳都刺生禽之其黨賂宣慰使誣以枉勘縱其賊已而賊劫河閒復被獲其誣始白俾再任一考親王邁魯原作買奴鎮益都其府屬病民諳都刺裁抑之民以無擾至正六年卒年七十子燮徹堅同知新喻州事以孝稱

楊景行字賢可吉安太和州人登延祐二年進士第授贛州路會昌州判官會昌民素不知井飲汲於河流故多疾痛不知陶瓦以茅覆屋故多火災景行教民穿井陶瓦免於災癘豪民號十虎悉捕置法乃勸學舍禮師儒置田以

元史卷四十八 列傳

十

饒士絃誦遂盛調永新州判官奉郡府命覈民田租一割宿敝改江西行省照磨轉撫州路宜黃縣尹總管府推官發摘奸伏郡無冤獄金溪奸民陶甲屢誣陷其縣長吏官吏畏之不敢詰陶遂暴橫一郡景行至以法痛繩之徙五百里外金溪僧雲住發人家墓取財物事覺官吏受賄緩其獄景行急案之卒治如法豪猾屏迹所歷州縣皆有惠政以翰林待制致仕年七十四卒

林興祖字宗起福州羅源人至治二年登進士第授同知黃巖州事三遷而知鉛山州鉛山豪民吳友文以造僞鈔致富遠至江淮燕薊莫不行使友文奸黠悍鷙分遣惡少四五十人爲吏於有司伺有欲告者輒先事戕之前後殺人甚眾奪人妻女十一人爲妾民銜冤不敢訴者十餘年

興祖至官卽張榜募民首告偽鈔俄有告者至佯以不實斥去又有告獲偽造二人竝贓者乃鞫之款服友文自至官爲之營救興祖命併執之須臾來訴友文者百餘人擇其重罪一二事鞫之獄立具逮捕其黨二百餘悉寘之法政聲籍甚江浙行省丞相別怯不花薦諸朝至正八年特遷道州路總管行至城外獐賊已迫其後相去僅二十里時湖南副使哈刺帖木爾屯兵城外聞賊至以乏軍需欲退兵興祖聞卽夜詣說畱之哈刺曰明日得鈔五千錠桐盾五百乃可破賊興祖許之入城視事卽以恩信勸諭鹽商貸鈔五千錠且取郡樓舊桐板爲盾日中皆備哈刺得鈔盾大喜遂畱禦賊賊聞新總管至一日具五百盾以爲大軍且至中夕遁去永明縣洞猺屢竊發興祖手榜諭之

元史卷四十八

列傳

十一

皆曰林總管廉而愛民三年不入境春旱蟲食麥苗興祖爲文禱之大雨三日蟲死而麥稔已而罷興作振貧乏輕徭薄斂郡中大治考課第一以年老致任終於家

觀音奴字志能唐兀氏居新州登泰定四年進士第由戶部主事再轉而知歸德府廉明剛斷發擿如神民有銜冤不直者雖數十年前事皆千里奔訴觀音奴立爲剖決旬日悉清彰德富商任甲抵睢陽驢斃令郗乙剖之任以怒毆郗經宿而死郗有妻王氏妾孫氏孫訴於官官吏納任賄謂郗非傷死反抵孫罪置之獄王來訴冤觀音奴立破械出孫於獄呼府胥語之曰吾爲文具香幣若爲吾以郗事禱諸城隍神令神顯告於吾有睢陽小吏亦預郗事畏觀音奴嚴明且懼神顯其事乃以任所賂鈔陳首曰郗實

傷死任賂上下匿其實吾亦得賂敢以首於是罪任商而釋孫氏靈陵民王乙有田三頃歲饑攜其妻就倉淮南而王得疾死其妻還則田爲豪民楊某所據王妻訴之官楊行賄僞作售券觀音奴令王妻挽楊同就崔府君神祠質之楊懼神之靈先期以羊酒浼巫囑神勿泄其事及王與楊詣祠質之果無所顯明觀音奴疑之召巫詰問巫吐其實曰楊以羊酒浼我囑神曰我實據王田幸神勿泄也因坐楊罪歸其田竝徹神祠亳州有蝗食禾觀音奴以事至亳民以蝗訴立取蝗向天祝之以水研碎而飲是歲蝗不爲災後遷都水監官

周自強字剛善臨江路新喻州人好學能文練吏事以文法推擇爲吏秦定閩廣西洞徭反自強往見徭酋說以禍

元史卷四十八 列傳

七

福中其要害徭酋立罷兵納款事聞於朝特超授廣西兩江道宣慰司都事再遷婺州路義烏縣尹周知民情而寬厚不爲刻深民有以爭訟訴於庭者一見卽能知其曲直然不遽加刑必反覆開譬之能悔悟首實則原其罪必怙惡不悛然後繩以法民畏且愛獄訟頓息民閒田稅之籍多失實以故差徭不平自強出令履畝覈之豪猾不能欺於是賦役均平部使者數以廉能譽於朝以江州路總管致仕

白景亮字明甫南陽人明法律善書算由征東行省譯史有勞超遷南恩知州升沔陽府尹奏取於朝特授衢州路總管先是爲郡者於民間徭役不盡校田畝以爲則吏得竝緣高下其手富民或優有餘力而貧弱多至破產景亮

始覈驗以均之視田多寡爲役輕重由是民不勞而事易集郡學久廢從祀諸賢無塑像諸生無廩饌祭服樂器有缺景亮皆爲備之儒風始振景亮自奉甚薄與妻脫粟對飯部使者上其事特詔褒美賜以宮錦改授台州路總管卒於官

王艮字止善紹興諸暨人淮東廉訪司辟爲書吏遷淮西會例革南士就爲吏於兩淮都轉運鹽使司以歲月及格授廬州錄事判官淮東宣慰司辟爲令史以廉能稱再調峽州總管府知事又辟江浙行省掾史會朝廷復立諸市舶司艮從省官至泉州建言若買舊有之船以付舶商則費省而工易集且可絕官吏培克之敝中書省報如艮言凡爲船六艘省官錢五十餘萬緡歷建德縣尹除兩浙都

元史卷四十八 列傳

三

轉運鹽使司經歷紹興路總管王克敬以計口倉不便議稍損其額以紓民力沮之者謂成籍不可改艮曰奈何重改民籍而輕棄民命乎且浙右之郡商賈輻輳未嘗以口計也曷移其所賦散於商旅之所聚於是議歲減紹興倉鹽五千六百引尋有復排前議者艮欲辭職去丞相亟遣畱艮而議遂定遷海道漕運都萬戶府經歷紹興之官糧入海運者十萬石城距海十八里歲令有司拘民船以備短送吏胥得竝緣爲奸及至海次主運者又不卽受有折缺之患艮執言曰運戶既有官賦之直何復爲是紛紛也乃責運戶自載糧入運船運船爲風所敗者當覈實除其數移文往返連數歲不絕艮取吏牘披閱卽除其糧五萬三千石鈔二百五十萬緡遷檢校江浙有詣中書訟松江

富民匿湖田沙蕩宜設官追取其糧行省遣良驗視良反覆辨其誑且謂輕聽擾民非國家培養根本之策事遂寢除江西行省左右司員外郎安福小吏誣富民包隱田租株連數百家屢按無實良言是州之糧比原額已增豈復有所欺隱行省用良言悉調之在任歲餘以淮東道副使致仕

盧琦字希韓惠安人登至正二年進士第十二年稍遷至永春縣尹始至振饑饉止橫斂均賦役減口鹽百餘引調包銀權鐵之無徵者乃新學宮延師儒課子弟鄰邑仙遊盜發琦適在邑境盜遙見之迎拜曰此永春大夫也爲大夫百姓者何幸乎吾邑長乃以暴毒驅我至此琦因立馬喻以禍福眾皆投刃槊請縛其首以自新琦許之旋縛至

元史卷四十八 列傳

西

琦械送帥府自是威惠行於境外十三年泉郡大饑死者相枕籍其能行者皆老幼扶攜就食永春琦命分居浮屠及大家使食之所存活不可勝計十四年安溪寇數萬人來襲永春琦聞召邑民喻之曰汝等能戰則與之戰不能則我當獨死之爾眾皆感憤曰赤子忍以父母舅賊邪且彼寇方將虜掠我妻子焚毀我室廬今日之事有進無退因踊躍爭奮大敗之明日賊復傾巢而至又破之大小三十餘戰斬獲千二百餘人賊遂遁去時兵革四起列郡皆洶洶不寧獨永春晏然十六年改調寧德縣尹而去

鄒伯顏字從吉高唐人爲建寧崇安縣尹崇安之爲邑區別其土田名之曰都者五十五都之田上送官者爲糧六千石其大家以五十餘家而兼五千石細民以四百餘



家而合一千石大家之田連跨數都而細民之糧或僅升合有司常以四百之細民配五十大家之役故貧者受役旬日而家已破伯顏取其糧籍而分計之有糧一石者受一石之役有糧升斗者受升斗之役田多者受數都之役田少者稱其所出而無倖免民始得以休息邑有宋趙抃所鑿溝溉民田數千畝歲久湮廢伯顏修長溝十里繞楓樹陂累石爲固悉復抃遺迹田遂常稔安慶路嘗得造僞鈔者遣卒械囚至崇安捕其黨囚與卒結謀將肆虐良民家伯顏執而歸諸安慶省臺咸舉其能選調漳州路判官劉秉直字清臣大都武清人至正八年爲衛輝路總管平徭役興教化賊劫汲縣民張聚鈔并殺之賊不獲秉直具詞致禱城隍祠而使人伺於死所忽有邨民阿蓮者戰怖

元史卷四十八 列傳

五

仆地具言賊之姓名及所在乃命尉襲之果得賊於汴遂正其罪秋七月螟生民患之秉直禱於八蜡祠螟皆自死天不雨禾且槁秉直詣城北太行之蒼峪神祠祈祝有青蛇宛延而出還行數里雷雨大至秩滿以親老去官侍養許義夫碭山人爲夏邑縣尹每親詣鄉社教民稼穡以勤惰爲賞罰三年境內豐足後尹封丘值至正四年大饑盜賊羣起抄掠州縣至近境乃單馬出郊十里外迎賊力言封丘縣小民貧皆已驚竄幸哀之無入吾境也賊感其誠竟他往封丘民得免於難

元史卷四十九

列傳三十三

忠義一

元初及至元延祐至正間效忠者六傳

月里麻思乃馬氏初太宗命與斷事官忽都那同署後又同阿朮魯克達魯花赤破南宿州太宗十三年辛丑使宋議和從行者七十餘人馳抵淮上宋將以兵脅之降誘以官爵月里麻思曰吾持節南來以通國好反誘我以不義汝國既不懼亡吾豈懼死邪竝語同行者當仗義死毋辱君命皆慷慨不少屈宋將知其不可奪乃幽之長沙飛虎寨三十六年及伯顏兵渡江前使臣郝經自真州釋還而月里麻思已死不及生還世祖深悼之詔復其家以子忽都哈思爲蒼刺罕給日廩忽都哈思自請從征宋以雪父恥帝嘉之授以上均州監戰萬戶至元十三年宋亡十八

元史卷四十九

列傳

年以招討使將兵征日本死於敵又有唐慶者太宗時爲國信使取金質子歲幣以金曹王來見帝於官山再往令金主黜帝號稱臣金主不從輒語侵之金君臣不能忍夜殺使者及從人於館和議遂絕此倚強凌弱自取殺身非行人之體君子無取焉

舊史唐慶傳今附

石珪泰安新秦人宋徂徠先生守道之裔孫也材武侷儻金貞祐南渡兵戈四起珪率少壯保險與滕陽陳敬宗聚兵山東破張都統李霸王兵於龜蒙山宋將鄭元龍以兵迎敵珪敗之於毫陽遂乘勝引兵入盱眙會宋賈涉誘殺漣水忠義軍統轄季先人情不安眾迎珪爲帥歲戊寅太祖使葛不罕與宋議和己卯珪令麾下劉順直抵尋斯干城入覲太祖慰勞順且敕珪曰如宋和議不成吾與爾永

結一家庚辰宋果渝盟珪棄其妻孔氏子金山仗劍渡淮  
宋將追之曰太尉迴完汝妻子珪不顧宋將沈其妻子於  
淮遂率順及李溫因亭里海歸木華黎木華黎承制授珪  
濟兗單三州兵馬都總管山東路行元帥佩金虎符後金  
棄東平珪與嚴實分據收輯濟兗沂滕單諸州癸未詔授  
東平兵馬都總管山東諸路都元帥秋七月珪破曹州與  
金將鄭從宐連戰數晝夜糧絕援兵不至珪臨陳馬仆破  
禽囚至汴金主壯之誘以名爵珪憤然曰丈夫能一身受  
封二國邪假我一朝當縛爾以獻金主怒悉殺於市珪怡  
然就死色不變其麾下立社兗州祀焉子天祿孫興祖皆  
襲千戶從伐金宋有戰功又李伯溫者大寧義州人長兄  
惟則平陽征行萬戶次兄伯通死錦州張致之難伯溫襲

元史卷四十九 列傳

二

平陽元帥府弟守正守忠先後襲職守平陽俱於太祖時

與金兵戰死

舊史石天祿李伯溫皆專傳今并附

攸哈刺

舊連拔都號

渤海人初名興哥世農家善騎射以武斷

鄉并金未避地大寧保高州富庶寨屢挫大軍木華黎率

兵攻之寨破奔高州元兵圍城下令曰能斬攸興哥首以

降則城中居民皆獲生守者召謂曰汝奇男子吾寧忍獻

汝首汝其往降乎不然吾一城且無噍類攸興哥乃折矢

出降諸將怒欲殺之木華黎曰壯士也畱之爲吾用俾隸

麾下從攻通州獻計一夕造礮三十雲梯數十附城州將

懼出寶貨以降木華黎命恣取之攸興哥獨取良馬三以

賞兵士木華黎以其功聞太祖賜名哈刺拔都從木華黎

略地燕南爲先鋒至大名金將徒單登城督戰攸哈刺射

之中左目其部將開門南奔追殺將盡論功賜金符充隨營監察戍寅授金虎符河東北路都元帥鎮太原時太原新破攸哈刺修城池繕兵甲招降屬邑市肆不改遠近來歸令軍中凡俘獲有親者聽贖無貴者官爲贖之民大悅辛巳三月金兵攻壽陽縣王胡莊垂破時左右裨將各分兵守險城中見卒不滿百攸哈刺夜半引甲騎十餘人救之金兵舉烽東西兩山攸哈刺趨之大戰天將明金兵遁去擣太原之虛獲其家屬攸哈刺聞之徑趨西山復奪以還五月金趙權府率兵三萬圍太原攸哈刺將騎三十出西門令騎曳柴揚塵聲言曰蒙古兵三萬至矣金兵懼潰去癸未太原諸邑皆平惟孟州陵井寨忻州清泉寨相脣齒皆未下甲申十月將兵至陵井遣卒叩寨門詐曰納糧

元史卷四十九 列傳

三

芻門啟徑入潰之餘寨皆降丁亥五月姦人夜獻太原東門於武仙仙引兵入攸哈刺鏖戰仙兵大至諸將自城外呼之出攸哈刺曰眞定史天倪平陽李守忠隰州田雄皆失守矣我又棄太原將何面目見主上及國王乎誓與城存亡遂歿於陳事聞命其長子芒兀台嗣鎮太原又潞州任志者歲戍寅歸木華黎於潞州授虎符充元帥收輯山寨數與金兵戰金嘗禽其長子如山以招之志親射殺其子赴木華黎大軍道經武安其縣已反爲金志死之子存亦戰死潞州又耶律忒末及子天祐以金都統降元會眞定將武仙之叛父子先後戰死舊史專傳今以其皆金降將也類附於此

合刺普華岳璘子也自唐至元世相高昌國十餘世至岳

璘隨兄歸附太祖事見元初文臣傳合刺普華幼習畏兀書及經史記誦精敏李璫叛其母奧敦氏攜季子脫烈普華避地登萊聞音問隔絕合刺普華從從叔父撒吉思平賊山東卒奉其母以歸撒吉思深器重之自謂其才不及言於世祖召給宿衛嘗以事至益都於四腳山下置廣興商山二冶以勞授金符爲商山鐵冶都提舉以職讓其弟元兵南伐宋以行都漕運使帥諸翼兵萬五千主餽運江南平上疏言親肺腑禮大臣以存國家之體興學校獎名節以勵天下之士正名分嚴攷課以定百官之法通泉幣卻貢獻以厚生民之本又言江南新附宜招舊族力稽通商弛征薄入以撫馴其民不然恐煩後慮帝多采用其言屬漕米二十萬緡邗溝達於河舟覆損十之一而又每斛

視都斛虧三升時阿合馬專政責償舟人合刺普華伏闕抗言舟戶無罪苟朝廷必不任虧損臣獨當其辜詔勿治阿合馬憤之出爲寧海路達魯花赤後改廣東都轉運鹽使兼領諸番市舶時盜梗鹽法東莞香山惠州負販之徒萬人爲亂江西行省命與招討使荅失蠻討捕之先驅斬渠魁乃躬抵賊巢招降餘黨仍奏除鹽法之不便者劾按察使脫歡姦利罷之羣盜歐南喜僭王號僞署丞相招討眾號十萬因圖上其山川形勢及攻取之策三十餘條遂與都元帥課伯海牙宣慰都元帥白佐萬戶王守信等分兵搃之未幾右丞梭都督兵征占城交趾屬護饗道比至東莞博羅二縣界中遇劇賊歐鍾等橫絕石灣其鋒銳甚合刺普華身先士卒且戰且行矢竭馬創徒步格鬪殺數

十人眾寡不敵爲所執賊欲奉之爲主不屈遂遇害是夕其妻希召特勒氏夢其來告曰吾死矣知事張德劉閏亦夢之二人相繼死而軍中往往見其乘騅督戰云後贈戶部尙書諡忠愍子二人僕文質越倫質僕文質官至吉安路達魯花赤贈宣惠安遠功臣雲中郡侯諡忠襄子六人僕玉立僕直堅僕哲篤僕朝吾僕列篋五人皆第進士僕哲篤官至江西行省右丞以文學政事稱於時越倫質子善著僕哲篤子僕百寮遜善著子正宗阿爾思蘭皆相繼登第一門世科之盛當代罕倫歐陽玄爲撰高昌僕氏家傳又至元間死於叛藩之難有伯巴者舊作伯晃合丹氏祖明里耶赤哥父脫倫閣里必事太祖太宗累有戰功伯巴舊臣子孫於世祖時爲萬戶領諸部軍馬屯守謙州至

元史卷四十九 列傳

五

元十二年親王昔列吉脫鐵木爾叛奔海都伯巴以聞且願提兵往討未得命爲彼所襲死焉脫鐵木爾虜其二子曰八刺曰不蘭奚分置左右待之頗厚居歲餘八刺陰結其近侍謀報父仇謀泄將家族南奔至一河馬驚不能渡回拒追騎射中數人力窮就禽脫鐵木爾責之曰我待汝厚甚而汝反何邪八刺曰我誓殺汝以報君父之讐今力窮被執任汝所爲逼令跪不屈以鐵錘碎其膝終不屈兒弟同被害幼子何都兀赤官至河北河南道廉訪使舊史伯八

兒專傳  
今并附

劉天孚字裕民大名人由中書譯史爲東平總管府判官改都漕運司判官知冠州再知許州所至有治績時檢核屯田臨潁鄧艾口民稻田三百頃有欲害之者指爲右屯

陳於中書請復築之中書下天孚按實天孚爲辨其非章數上乃止襄城與葉縣接壤其南爲湛河襄城民食滄鹽葉縣民食解鹽刻石河南岸爲界葉縣令妄徙石於北二里誣其民食私鹽繫治百餘家兩縣鬪辯天孚爲攷正經界申中書葉令乃伏罪歲大旱天孚禱卽雨野有蝗俄爲羣鳥啄盡明年麥熟時有青蠡食麥忽生大花蟲盡齧之許人立碑頌焉延祐閒知河中府視事始兩月時明宗封周王出鎮雲南行次延安陝西行省丞相阿思罕謀擁戴舉兵至河中時事起不虞天孚日夜治戰守具選丁壯分守要害令河東縣達魯花赤脫因都守大慶關津口盡收船舫東岸又遣官守汾陽守禹門守風陵等渡阿思罕軍列柵河西岸使來索舟天孚度不能拒凡八遣人至晉寧

元史卷四十九 列傳

六

乞援兵不報居七日阿思罕縛棧河上欲縱火屠城同知府事鐵哥與河東廉訪副使明安荅見事急且患城中人偏乃詣阿思罕軍阿思罕囚之而斂船濟兵兵旣入城阿思罕方坐府治號令諸軍天孚佩刀直前眾遏之不得進退謂幕僚王從善等曰與其辱於賊吾寧蹈河以死遂拂衣出時天寒河冰方堅天孚拔所佩刀斫冰開北望再拜投水死阿思罕大怒籍其家郡人咸哀痛之事平召其弟天惠給驛歸葬贈彭城郡侯諡忠毅

昔班帖木爾夫婦者蒙古人先是昔班帖木爾嘗爲趙王位下同知怯憐口總管府事其妻嘗保育趙王及順帝至正十八年趙王部落蔑里叛欲殺之昔班與妻謀以其子觀音奴服王平日衣冠居王宮夜半夫妻衛趙王微服遁

去比賊至執觀音奴知其假王遂殺之而趙王竟得免事  
聞詔授昔班同知河東宣慰司事其妻刺八哈屯雲中郡  
夫人子觀音奴贈同知大同路事仍旌表其門閭舊史見  
順帝本  
紀今節取  
入忠義傳

忠義二

元末死於楚  
賊者七傳

伯顏不花的斤字蒼崖畏吾氏駙馬都尉中書丞相封高  
昌王雪雪之孫駙馬都尉江浙行省丞相封荆南王朵爾  
之子也好學曉音律初用父蔭同知信州路事又移建德  
路會徽寇犯遂安伯顏不花將義兵平之又禽洎安叛賊  
方清之以功遷本路總管至正十六年授衢州路達魯花  
赤明年行樞密院判官阿魯輝引兵經衢州軍無紀律所  
過輒大剽掠伯顏不花曰以官軍而爲民患此國賊也帥

元史卷四十九

列傳

七

兵逐之出境郡賴以寧擢江東道廉訪副使十八年十二  
月江西陳友諒遣賊黨王奉國等號二十萬寇信州明年  
正月伯顏不花自衢引兵援焉遇賊城東力戰破走之時  
鎮南王子大聖奴樞密院判官席閏等屯兵城中聞伯顏  
不花至爭開門出迎後數日賊復來攻伯顏不花大饗士  
約曰今日破賊不用命者斬乃部分諸將命阿速諸軍及  
民義爲左翼出南門高義范則忠將信陽一軍爲右翼出  
北門自與忽都不華將沿海諸軍爲中軍出西門因奮擊  
入賊營斬首數千級幾禽奉國適賊將突至官軍幾陷復  
勒兵力戰大破之二月友諒弟友德營於城東繞城植木  
柵攻益急又遣僞萬戶周伯嘉來說降高義潛與之通給  
忽都不華等謂與奉國相見則兵覺可解忽都不華信之



率則忠等十人往見奉國囚之不遣明日奉國令高義以計來誘伯顏不花時伯顏不花坐城上見義單騎來怒謂曰汝誘十帥無一人還今復來誘我邪數其罪斬之由是日夜鏖戰糧竭矢盡不少衰夏四月有大呼於城下者稱有詔來自江西招降伯顏不花曰如此乃賊耳吾大元臣子可受爾僞詔乎城存與存城亡與亡吾計之熟矣時軍民惟食草苗茶紙既盡乃至括糶鞭底掘鼠羅雀殺老弱以食五月大破賊兵六月奉國親來攻城晝夜不息者踰旬穴地百餘所或魚貫梯城而上伯顏不花登城麾兵拒之已而士卒力疲不能戰萬戶願馬爾以其眾叛城遂陷席間出降大聖奴及參謀海魯丁皆死之伯顏不花力戰不勝遂自殺其部將蔡誠盡殺妻子乃與蔣廣奮力巷戰

元史卷四十九 列傳

八

俱死之先是伯顏不花之援信州也嘗南望泣下曰我爲天子司憲視彼城之危急忍坐視乎吾知上報天子下拯生民餘皆無可恤所念者太夫人耳即日入拜其母鮮于氏曰兒今不得事母矣母曰爾爲忠臣吾卽死復何憾鮮于氏太常典簿樞之女也伯顏不花因命子耶先不花奉其母閒道入福建以江東廉訪司印送行御史臺遂力守孤城而死朝廷賜諡曰桓敏

道童高昌人自號石巖性深沈寡言以世胄入官至正十一年以平章政事行省江西是年徐壽輝起斬黃平章圖堅理不花將兵捍江州旣而土寇蠶起道童素不知兵倉皇無所措用左右司郎中普顏不花言請撫州致仕左丞章伯顏至署商軍務以便宐使署本省左承事專任調遣

乃與普顏不花設禦敵計甚悉明年正月武昌陷圖堅理不花由江州遁還二月普顏不花將兵往江州至石頭渡遇賊戰敗道童聞之大恐卽懷印遁走普顏不花還與章伯顏定守城計後數日道童始自南昌民家來歸遂議分門各守以備敵三月賊眾來圍城城中置各廂官及各巷長晝夜堅守眾心翕然而道童素恤民多爲之用賊圍城凡兩月民無離志普顏不花密召死士數千面塗青額抹黃布衣黃衣爲前鋒又別選精銳數千爲中軍而募助戰者殿後命萬戶章安因卜魯哈台領之夜半開門伏柵下黎明鉦鼓四面攻之賊驚爲神敗走遂乘勝擣其營復分掃其餘黨皆任章伯顏普顏不花之功伯顏尋以疾卒朝廷以道童捍賊有功加大司徒開府仍賜龍衣御酒及秋

元史卷四十九 列傳

九

命亦憐真班爲江西行省左丞相火尼赤爲左丞同將兵來江西未幾亦憐真班卒道童屬火尼赤平富瑞二州分鎮其地適歲大旱公私匱乏道童乃移咨江浙行省借米數十萬石鹽數十萬引與軍民約三日人糶官米一斗入昏鈔二貫又三日買官鹽十斤入昏鈔二貫民皆便之由是按堵如故賊不敢犯十八年夏四月陳友諒復攻江西城時火尼赤已遷平章行便宜事素與道童不相能且貪忍不得將士心見城且陷遂夜遁去道童退保撫州路欲集諸縣義兵以圖克復勢已不可爲遂爲賊害事聞賜諡

忠烈

白列傳移入

全普庵撒里字子仁高昌人初爲中書省檢校時太師汪家奴擅權用事臺諫無敢言者普庵撒里獨於眾中歷數

其過譎譎無懼色拜監察御史卽首劾汪家奴十罪乃見  
黜然氣益振歷詆權貴朝臣莫不畏慄出爲廣東廉訪使  
尋除兵部尙書未幾授贛州路達魯花赤發摘奸惡一郡  
肅然至正十一年潁州盜起卽修築城壘旬月守禦畢備  
募勇士三千人日練習之屬邑有爲賊所陷者遣兵復之  
境內悉安十六年以功拜江西行省參政分省於贛十八  
年江西下流諸郡皆爲陳友諒所據乃與總管航海赤戮  
力同守友諒遣其將幸文才率兵圍贛使人脅降普庵撒  
里斬其使日擐甲登城拒戰凡四月兵少食盡義兵萬戶  
馬合某沙欲舉城降賊普庵撒里不從遂自刎事聞贈諡  
曰傲哀哈海赤守贛尤有功城陷之日賊將脅之使降哈  
海赤謂之曰與汝戰者我也毋殺贛民惟速殺我遂見害

元史卷四十九 列傳

十

又瀏陽周鏜者字以聲通春秋登泰定四年進士第授衡  
陽縣丞再調大冶縣尹抑豪強惠窮民治行爲諸縣最累  
遷翰林國史院編修官出爲四川儒學提舉便道還家無  
何湖南北盜起瀏陽無城守者皆驚竄賊至得鏜欲推爲  
主鏜瞠目厲聲罵賊死其同里謝一魯者鄉貢進士嘗爲  
石林書院山長亦舉家死潭州之賊

舊史周鏜專傳今并附

聶炳字韞夫江夏人元統元年進士授同知平昌州事轉  
寶慶路推官至正十二年遷知荆門州纔半歲淮漢賊起  
荆門不守炳出募土兵得眾七萬復荆門又與四川行省  
平章交住復江陵旣而斬黃安陸之賊復振賊將兪君正  
合兵來攻荆門炳率孤軍晝夜血戰援絕城陷爲賊所執  
極口罵不絕賊以刃抉其齒盡乃斷左臂而支解之未幾

賊陷潛江縣達魯花赤明安達爾率勇敢出擊禽其僞將  
進營蘆泚賊眾奄至出鬪死其家皆被害一子桂山海身  
懷印綬去得免明安達爾唐兀氏字士元炳同年進士也  
又茶陵劉畊孫字存吾至順元年進士授臨武縣尹建學  
校歷建德徽州瑞州三路推官所至有聲至正十二年春  
斬黃賊攻破湖南畊孫傾家募士以援茶陵賊至輒卻故  
茶陵久不失守十五年轉寧國路推官歲饑勸振活者萬  
計會長鎗賊鎖南班程述謝璽等攻寧國畊孫分守城西  
南江浙行省遣援兵至則已疲而城恃有援不爲備賊夜  
四鼓引眾緣堞而上城遂陷畊孫力戰遇害弟燾孫常寧  
州儒學正湖南陷常寧長吏棄城走民奉印請燾孫爲城  
守城賴以寧者一年外援俱絕死之長子碩爲武昌江夏

元史卷四十九 列傳

十一

縣魯湖大使起義兵援茶陵亦死又沔陽州推官俞述祖  
平江路管軍鎮撫守昱嶺關桂完澤湖廣行臺御史中丞  
守饒州魏中立安陸知府丑閻竝以城守死於蘄黃之賊  
是時賊旣陷湖廣分攻州郡官軍多疲懦不能拒所在無  
賴子多乘閒竊發不旬日眾輒數萬皆短衣草屨木杷竹  
鎗截緋帛爲中襦彌野皆赤實烏合不能戰而州郡望風  
驚潰以至賊長驅如入無人之境其賢者又各以倉卒敗  
死傳不勝傳故彙敘於此

舊史劉畊孫俞述祖桂完澤  
魏中立丑閻皆專傳今彙附

高昌字羅

舊作字羅帖  
木兒高昌人

字國賓由宿衛補官至襄陽路達

魯花赤至正十一年盜起汝潁均州鄖縣人田端子等亦  
聚眾殺官吏字羅將民兵捕斬之未幾行省廉訪司同檄  
字羅以其所領兵會諸軍於均房同討賊賊始退而穀城

光化以急告卽帥兵趨穀城而分遣樊城主簿脫因等趨光化且使求糧於襄陽不應遣同知耶先不花促之又不應軍乏食不能行乃駐於柴店復遣從子馬哈失力往告詞甚苦切廉訪分司王僉事本路總管柴順禮怒其責望械之適紐眞來獻光化所獲首級且言孛羅在穀城與賊相持未知存歿宜急濟其糧少緩恐弗及矣於是脫二人械遣還而命耶先不花率數千人會孛羅討賊明年正月襄陽失守耶先不花等聞之驚潰孛羅領義兵二百且戰且行至監利縣遇沔陽府達魯花赤交住同知三山安陸府同知燕只不花荆襄提舉相哥失力之師時濱江有船千餘乃糾合諸義兵丁壯水工五千餘人署以軍號給以刀稍具哨馬五十水陸繼進比至石首縣聞中興路亦陷

元史卷四十九 列傳

三

乃議趨岳州就元帥帖桀而道阻不得前仍趨襄陽賊方駐楊湖港乘其不虞擊之獲船二十七生禽賊黨劉交兒訊得其情進次潛江又斬賊數百級獲三十餘船梟賊將劉萬戶許堂主等是日甫止兵未食而賊大至與戰抵暮交住等軍各當一面不能救孛羅被重創磨馬哈失力使去曰吾以死報國汝無畱此馬哈失力泣曰死生從叔父旣而孛羅被執賊請同爲逆孛羅怒罵之遂遇害馬哈失力帥家奴求其尸復與賊戰俱歿於陳舉家死者凡二十人又卜理牙敦者山南廉訪使治中興至正十二年斬黃賊來犯與前判官上都皆力戰被執不屈死

卜理牙敦  
舊史專傳

附今并

潮海札刺台氏靖安縣達魯花赤至正十二年斬黃賊起

潮海與縣尹黃紹同集義兵禦賊未幾賊數萬來寇紹赴行省求援潮海獨率眾戰象湖大破之乃起進士胡斗元塗淵舒慶遠甘棠等謀畫而以勇士黃雲爲前鋒自二月至於八月戰屢捷禽賊將洪元帥而賊黨益盛黃雲戰死我軍挫衄潮海遂被圍尋爲賊所執死於富州子民安圖襲父職爲本縣達魯花赤十三年帥眾敗走賊將復縣治十四年賊兵復至民安圖迎戰力竭賊執而高之紹字仲先臨川人登至正八年進士第以求援出靖安而道阻絕遇官軍護之得入龍興而龍興亦被圍其後圍解紹乃與民安圖招諭叛境過建昌之高坪遇賊紹與戰不勝正衣冠罵賊死之斗元字元浩靖安人至正十年領江西鄉薦第一賊至靖安斗元以鄉兵擊敗之入縣治與潮海共圖

元史卷四十九 列傳

三

戰守及潮海被執賊脅之使降斗元罵不屈乃以土埋其腰不死又縛置暗室斗元仆牆以出逃入深山狂罵而死黃雲撫州人寓靖安素以勇捷稱每接戰獨以身當敵嘗爲數十人所圍卽奮勇躍出至是身中數十槍噴血罵賊而死

汪澤民字叔志徽之婺源州人宋端明殿學士藻之七世孫也擢延祐五年進士第授同知岳州路平江州事以母年八十上書願奪所授官一等或二等得近地以便養不允南歸奉母之官州民李氏以貲雄誣其孀弟婦以奸事將據有其財獄成而澤民至卒雪之會朝廷徵江南包銀府檄澤民分辨民不擾而事集尋遷南安路總管府推官鎮守萬戶多爾赤持官府短長其黨王甲爲府史毆傷縣

令訴郡同僚畏多爾赤之勢不敢申理澤民獨捕甲繫之獄多爾赤賂巡按御史欲出之澤民正色與辨御史沮怍乃卒罪王甲潮州府判官錢珍以奸淫事殺推官梁楫事連廣東廉訪副使劉珍坐繫者二百餘省府凡六委官鞫問皆顧忌淹延弗能白復檄澤民讞之獄立具改平江路總管府推官有僧淨廣與他僧有憾久絕往來一日邀廣飲廣弟子急欲得師財且苦其筆楚潛往他僧所殺之明日訴官他僧不勝攷掠誣服三經審錄詞無異結案待報澤民取行凶刀視之上有鐵工姓名召工問之乃其弟子刀也一訊吐實卽械之而出他僧人驚以爲神調濟寧路兗州知州建議衍聖公襲封職僅三品宜進其品秩以示崇聖之意廷議從之至正三年除國子司業與修遼金宋

元史卷四十九 列傳

七

史書成遷集賢直學士未兩月卽移疾致仕歸十五年斬黃賊犯宣州城中兵不滿數百江東廉訪使道童雅重澤民日就之詢守禦計城得無虞明年長槍賊鎖南班等叛來寇城或勸澤民去澤民曰昔江萬里寓鄱陽大軍偪城不隨眾走況軍民離合視吾去畱吾何忍去父母之邦乎畱不去凡戰鬪籌畫多澤民參決之屢敗賊兵旣而寇益眾城陷被執罵賊遇害年七十事聞贈江浙行中書省左丞追封譙國郡公謚文節宋濂碑其神道舊史在列傳今移入

忠義三

元未死淮浙之難者六傳

李齊字公平廣平人家甚貧客於江南工辭章元統元年進士第一歷僉河南淮西廉訪司事移知高郵府有政聲至正十年盜突入府驛取十二馬去齊躬追殺之十一年

州人秦觀保造兵仗將圖劫掠復獲誅之十三年秦州白駒場亭民張士誠破秦州河南行省遣齊往招降被拘久之賊酋自相殺始縱齊來歸秦州平賊徒尙蠱聚士誠復鼓變殺參政趙璉掠官庫民財走入得勝湖俄陷興化縣行省以左丞僕哲篤偕宗王鎮高郵使齊出守甃社湖夏五月乙未數賊入城一譟呼而省憲官皆遁齊急還救城賊已閉門拒守遂連興化接得勝湖舟艦四塞蔓入竇應縣已而有赦詔至高郵不得入賊給之曰請李知府來乃受命行省強齊往至則下齊獄中齊益辨說士誠本無降意特遷延爲繕劄計官軍謀知之乃進攻城士誠呼齊使跪齊叱曰吾膝如鐵豈爲賊屈士誠怒扼之跪齊立而詬之乃曳倒槌碎其膝而高之論者謂大科三魁若秦不華

元史卷四十九 列傳

五

沒海上李黼隕九江泊齊之死皆不負所學云同死趙璉者字伯器宏偉之孫也至治元年進士第屢遷杭州路總管強毅開敏杭人碑其政績會朝廷命李齊招諭士誠乃移璉以參知政事鎮秦州璉方治戈船趨濠泗士誠疑憚不敢發又覘知州城無備遂夜四鼓復反襲城璉力戰墜馬被執又盛昭者字克明歸德人官淮南行省照磨行省遣入高郵授士誠官不受被拘皆罵賊死趙璉盛昭舊史專傳今并附石普字元周徐州人至正五年進士授國史院編修官改經正監經歷淮東西盜起朝廷方用兵普以將略薦丞相脫脫討徐州以普從行徐平錄功遷兵部主事尋遷樞密院都事從樞密院官守淮安時張士誠據高郵普詣丞相面陳破賊之策且曰高郵負重湖之險地皆沮洳騎兵莫



能前與普步兵三萬保取之高郵既平則濠泗易破請先驅爲天下忠義倡丞相壯之命權山東義兵萬戶府事招義勇萬人以行而汝中柏者方用事陰沮之滅其軍半初令普便宜行事及行又使聽淮南行省節制普行次范水砦日未夕趣軍中具食夜漏三刻下令銜枚趨寶應其營中更鼓如平時抵縣卽登城樹幟城賊驚潰因安撫其民諸將忌普功始水陸進兵乘勢拔十餘砦斬賊數百將抵高郵城分兵三隊一趨城東備水戰一爲奇兵虞後路普自將攻北門遇賊與戰賊不能支遁入城普先士卒躡之縱火燒關門賊懼謀棄城走而援兵按不進有蒙古軍千騎突出普軍前欲收先入功賊以死捍蒙古軍恇怯卽馳回遂爲賊所蹂踐墜水中普軍亦亂賊乘之普勒餘兵血

元史卷四十九 列傳

六

戰良久仗劍大呼曰大丈夫當爲國死有不進前者斬奮擊直入賊陳中從者僅三十人至日西援絕被創墜馬復步戰數合左脅爲賊鎗所中猶手握其鎗斫賊死賊眾攢鎗以刺普普與從者皆力戰死之

納速刺丁字士瞻其父馬合木從征襄陽以勞擢濬州達魯花赤因家大名納速刺丁起身鄉貢進士辟掾淮東宣慰司至正十年以民兵襲眞州賊有功已而秦州賊大起鎮南王府宣慰司請參議軍事納速刺丁建議築四城立外寨捷堤穿河募兵與賊抗行省檄其提戰艦六十海舟十四上下巡捕以固江面且護蒙古軍五百往江寧道遇賊斬擊二百餘級遂抵龍潭而還未幾出邏江上奪賊火船二百賊遁走俄復據龍潭口又擊走之追斬三百餘級

其子寶童禽賊首及其號旗捷聞賞賚優渥召還眞州南行臺檄使援蕪湖及至賊船已薄岸遂三分戰艦縱擊之賊奔潰俘斬甚眾賊不得渡江者多納速刺丁之功也秦州賊李二起行省移之捍高郵得勝湖賊船七十餘柁乘風而來卽前擊之焚其二十餘船賊潰去李二失援遂降其黨張士誠殺李二復爲亂戕參政趙璉入據興化而水陸襲高郵屯兵東門納速刺丁以舟師會諸軍討之距三垛鎮麾兵挫賊前鋒後賊鼓譟而前乃發火箭火鏃射之死者蔽流而下賊繚船於背盡力來攻而阿速衛軍及眞滁萬戶府等官見賊勢急皆遁去納速刺丁顧必死謂其三子寶童海魯丁西山奴等速走寶童等不肯去遂皆死之事聞贈納速刺丁淮西元帥府經歷又樊執敬者鄆城

元史卷四十九 列傳

七

人以江浙行省參政督海運於平江舟將發海口爲海寇劫糧以去俄守杭州昱嶺關賊至城陷騎馬奮力斫賊死

樊執敬舊史專傳今并入

褚不華字君實隰州石樓人沈默有器局泰定初補中瑞司譯史授海道副千戶連拜南臺西臺監察御史遷淮東廉訪副使汝潁盜發勢張甚不華行部至淮安極力守禦多所斬獲且請知樞密院老章判官劉甲守韓信城相犄角復劾諸將逗撓之罪擢廉訪使劉甲有智勇與賊戰輒勝賊憚之號曰劉鐵頭不華頗賴之總兵者聞不華劾己益恚嫉乃檄甲別將兵擊賊冀以困不華甲去韓信城陷賊乃掘塹相銜捷水寨以合圍旣而天長青軍叛普顏帖木爾所統黃軍復叛賊皆挾之來攻不華知事危退入哈

刺章營賊稍引去乃出抵楊邨橋賊奄至殺廉訪副使不  
達失里不華以餘兵入淮安時城之東西南三面皆賊惟  
北門通流陽阻赤鯉湖爲賊據流陽之路又絕賊計孤城可  
倚其芻餉而赤鯉湖爲賊據流陽之路又絕賊計孤城可  
取進柵南鎖橋不華與元帥張存義出大西門會僉事忽  
都不華兵突賊柵殊死戰賊敗走追北二十餘里城中食  
且盡元帥吳德琇運糧萬斛入河爲賊所掠賊與青軍攻  
圍日益急總兵者屯下邳相去五百里按兵不出凡遣使  
十九輩告急皆不聽城中餓者仆道上卽取啖之草木螺  
蛤魚蛙燕鳥及鞞皮鞍韉革箱敗弓之筋皆盡徹屋爲薪  
人多露處坊陌生荆棘力盡城陷不華猶據西門力鬪中  
傷見執爲賊所鬻次子伴哥冒刀護之亦見殺時至正十

元史卷四十九 列傳

六

六年十月乙丑也不華守淮安五年殆數十百戰精忠大  
節人比之張巡云朝廷聞之贈翰林學士承旨衛國公諡  
忠肅

月魯不花字彥明蒙古遜都思氏太祖四傑功臣赤老溫  
次子納圖爾之玄孫也生而容貌魁偉咸以合器期之未  
冠父脫帖木爾以千戶戍越因受業於韓性試江浙鄉闈  
中第一方揭曉試官夢月中有花象已而果符其名登元  
統元年進士第至正中除吏部員外郎奉命至江浙糴粟  
二十四萬石至則第戶產之高下以爲糴之多寡不擾而  
事集旣而軍餉不給又奉命出糴於江浙召父老諭之不  
踰月糧事以畢太師右丞相脫脫南征辟從軍事督饋餉  
尋拜監察御史首上疏言郊廟禮缺天子宜躬祀南郊殷

祭太室皇太子天下之本當簡老成重臣爲輔導以成其德遷吏部侍郎有建議欲於河閒長蘆置局造海船三百者卽上書中書省言其非便忤議者遷工部侍郎後分部彰德道過河閒民遮擁拜謝曰微公言吾民其斃矣會除保定路達魯花赤保定歲輸糧數十萬石於新鄉苦弗便月魯不花請輸京倉以恤之俄除吏部尚書保定父老百數詣闕乞畱監郡以撫吾民遂以尙書仍知郡事會賊北渡河日修城浚濠爲戰守具廷議發五省八衛兵出戍外鎮月魯不花疏請畱其兵護本郡遂兼統黑軍數千人及圍結西山十二寨民人軍勢大振賊再侵境皆敗去召還爲詳定使保定民不忍其去繪像祀之去保定一月而城陷朝廷以月魯不花素負民望令入城招諭之抵城賊閉

元史卷四十九 列傳

九

關不出改大都路達魯花赤轉吏部尙書會劇賊程思忠據永平堅壁不下詔月魯不花招撫之眾悉難其行月魯不花毅然竟入城諭賊賊皆感泣羅拜納降還遷翰林侍講學士拜江南行御史臺中丞乃由海道趨紹興旣而除浙西廉訪使會張士誠據浙西僭王號度弗可與竝處令具舟載妻子而匿身木櫃中蔽以橐秸脫走至慶元士誠部下覺之遣百騎追至曹娥江不及而反俄改山南道廉訪使浮海北而往道阻還抵鐵山遇倭賊船甚眾乃挾同舟人力戰拒之倭賊給言投降弗納於是賊卽登舟攫月魯不花令拜伏月魯不花罵曰吾朝廷重臣寧拜賊耶麾家奴那海刺殺首賊遂與次子樞密院判官老安姪百家奴皆死之同舟死者八十餘人事聞贈遼陽行省平章政

事謚忠肅

自列傳  
移入

達識

舊連帖  
陸邈號

字九成康里托托子也幼與其兄塔識俱入

國學爲諸生讀經史悉能通大義初以世胄補官至正九年遷湖廣平章沅靖柳桂等路猺獠竊發達識請置三分省一治靜江一治沅靖一治柳桂以左右丞參政分兵鎮其地已而諸猺獠悉降召還復爲大司農十一年台州方國珍起海上奉詔與浙東宣慰使秦不華同往招諭之屢遷江浙行省左丞相許便宜行事時江淮盜勢日盛南北道梗達識獨治方面而任用非人通賄鬻爵謗議紛然所部郡縣往往淪陷十六年正月張士誠陷平江七月逼杭州達識棄城走富陽萬戶普賢奴力拒之而苗軍帥楊完者時駐嘉興亦引兵至擊走士誠初達識引完者爲江浙

元史卷四十九 列傳

三

右丞而苗軍素無紀律所過抄掠蕩然淫虐無人理喜則人怒則獸無論貴家命婦室女必圍宅勒污信宿始得縱還否則指以通賊縱兵屠害民閒謠曰死不怨秦州張生不謝寶慶楊而達識方倚完者軍爲重莫敢禁遏故其軍日肆明年士誠寇嘉興屢爲完者所敗士誠乃遣蠻子海身以書詐降而書詞多不遜完者欲納之達識不可完者固勸乃許之士誠始要王爵不許又請爵爲三公達識遂承制授士誠太尉其弟士德士信及其黨皆授官有差於是朝廷以招安張士誠爲達識功詔加太尉時徽州建德皆已陷完者屢出師不利士誠素欲圖完者而完者時又強娶平章慶童女且縱兵淫掠達識久厭苦之乃陰與士誠合謀令以兵除之揚言使士誠出兵復建德完者營於

杭州不爲備遂被圍苗軍潰完者盡殺所有婦女數十人而後死士誠兵遂據杭州達識徒存虛名而已俄而士誠令其部屬自頌功德必欲求王爵達識不得已以聞於朝再三不報士誠遂自立爲吳王徙達識至嘉興逼取其符印峻垣錮門守之又使人至紹興從御史大夫普化帖木爾索行臺印普化封印置庫中曰我頭可斷印不可與又迫之登舟曰身可死義不可辱也從容沐浴更衣與妻子訣賦詩二章仰藥死臨死擲杯地上曰我死矣逆賊當踵我亡也後數日達識聞之歎曰大夫且死吾不死何爲遂進藥酒飲之而卒士誠乃使載其柩及妻孥北返於京師普化字遷善蒼魯乃蠻氏行臺御史大夫帖木哥子也論者以爲其死視達識爲差勝云

元史卷四十九列傳移入

三

忠義四

元未死明兵者八傳

普顏不花字希古蒙古氏偶儻有大志至正五年由國子生登右榜進士第一人授翰林修撰十一年遷江西行省左右司郎中斬黃賊徐壽輝來寇普顏不花戰守功爲多語在道童傳十六年轉山東行中書參政十八年詔與治書侍御史李國鳳同經略江南至建寧江西陳友諒遣鄧克明來寇而平章政事阿魯溫沙等皆夜遁國鳳時分鎮延平城陷遁去普顏不花命築各門甕城前後拒戰六十四日旣而大敗賊眾明年召還授山東宣慰使再轉知樞密院事平章山東行省守禦益都明兵壓境將眾捍城力戰城陷而平章保保出降普顏不花還拜母趨官舍坐堂上主將素聞其賢召之再三不往旣而面縛之普顏不花

不屈死先是其妻阿魯眞歷呼家人告以殉死而二弟婦已各抱幼子及婢妾溺舍南井死井填咽不可容遂抱子投舍北井其女及妾女孫女皆隨溺焉是時有申榮者平章山東行省守東昌見列郡皆降告其父曰人生世間不能全忠孝者兒也父曰何爲榮曰城中兵少不敵戰則萬人之命由兒而廢但有一死報國耳遂自經

福壽唐兀人幼俊茂知讀書尤善應對既長入備宿衛屢遷同知樞密院事至正十一年潁州賊起時車駕在上都朝廷皆欲驛奏待命福壽謂俟得請還則事必無及決議調兵五百遣衛官哈刺章忻都怯來討之而後以聞明年改耶可札魯忽赤未幾出爲淮南行省平章是時濠泗俱已陷師久無功福壽至議築石頭斷江面守禦有方眾恃

元史卷四十九 列傳

三

以固十五年遷江南行臺御史大夫先是集慶嘗有警阿魯輝以湖廣平章將苗軍來援事平其軍鎮揚州苗軍無紀律日事殺虜俄并殺阿魯輝以叛高郵廬和等州相繼淪陷集慶勢日孤且倉庫無積蓄人心日震恐福壽乃使民兵自守勸餉激士明兵圍集慶福壽盡閉諸門獨開東門數出戰勢不能支城遂破福壽獨據胡牀坐鳳凰臺下指麾左右或勸之去叱曰吾爲國家重臣與城存亡去將安往達魯花赤達尼達思見其獨坐亦從畱弗去俄而亂兵四集皆死之又同時死者有治書侍御史賀方字伯京晉寧人以文學名事聞贈福壽江浙行省左丞相衛國公

諡忠肅

自列傳  
移入

閔本字宗先河內人刻志於學早歲得推擇爲禮部令史

御史大夫不衽辟爲掾平反冤獄甚有聲拜監察御史五轉爲吏部尚書移刑戶二部皆以能見稱授集賢侍講學士明兵薄京師本乃朝服與妻程氏北向再拜大書於屋壁曰元中奉大夫集賢侍講學士閔本死此遂各緼焉二女亦自緼其旁有拜住者康里人也字聞善以材累官至太子司經明兵至謂家人曰吾始祖海藍伯封河東公與太祖同事王罕太祖取王罕收諸部落吾祖引數十騎馳西北方太祖使人追問之曰昔者與皇帝同事王罕王罕今已滅欲爲之報仇則帝乃天命欲改事帝則吾心有所不忍故避之於遠地以沒吾生耳吾祖生沙漠其言尙如此今吾生長中原讀書國學而不知大義乎遂赴井死家人瘞之舍東悉焚書籍爲殉云

元史卷四十九 列傳

三

趙弘毅字仁卿眞定晉州人少好學家貧無書傭於巨室書則爲役夜則借書讀之嘗受經於臨川吳澄始辟翰林書寫再轉爲國史院編修官調大樂署令明兵入京城弘毅與妻解氏皆自緼其子恭中書管句與妻子訣曰今乘輿北奔吾父母已死尙何敢愛死乎或止之曰我曹官卑何自苦若此恭叱曰忠義人各盡豈問職之崇卑乎遂公服北向再拜就緼死恭女官奴年十七亦自經以殉

朴賽因不花字德中肅良合台人有膂力善騎射累官至嶺北行省右丞平章政事會皇太子撫軍冀寧承制拜中書平章政事明兵逼京師詔守順承門所領僅數百羸卒歎息謂左右曰國事至此吾但知與此門同存亡也城陷被執不屈死之是時有張庸者字存中溫州人性豪爽精



太乙數會世亂以策干經略使李國鳳承制授庸福建員外郎治兵杉關頃之計事赴京師因進太乙數圖順帝喜之擢祕書少監皇太子立大撫軍院命庸團結房山除刑部尚書仍領團結會諸寨既降庸守駱駝谷遣從事段禎求援於擴廓不報庸獨堅守拒戰眾將潰庸無去志已而寨民李世傑執庸出降與禎同被害

丁好禮字敬可真定蠡州人精律算初試吏於戶部辟中書掾屢遷京畿漕運使建議置司於通州講究漕運利敝著爲成法人皆便之除戶部尚書時國家多故財用空乏好禮能撙節浮費以給國用至正二十年拜中書參政時京師大饑天壽節廟堂欲用故事大譙會好禮言今民父子有相食者君臣當修省以弭大患譙會宜改常度不聽

元史卷四十九 列傳

十四

遂乞致仕家居擴廓從皇太子還京輸山東粟以遺朝貴餽好禮麥百石不受二十七年復起爲中書平章政事尋以議論不合謝政去特封趙國公明兵入京城大帥召之不肯行昇至齊化門抗辭不屈而死年七十五是日中書參政郭庸亦昇至齊化門眾叱之拜亦不屈死庸字允中蒙古氏由國學生釋褐出身屢遷爲陝西行臺監察御史與同列劾知樞密院事耶先帖木爾喪師左遷中興總管府判官其後耶先以罪黜召拜監察御史累轉參政中書其節義與好禮並稱云

柏帖穆爾字君壽蒙古人家世履歷無攷居官所至著廉能至正中累遷福建行省左右司郎中二十七年明騎兵出杉關取邵武以舟師由海道趨閩奄至城下柏帖穆爾

知城不可守引妻妾坐樓上慷慨謂曰丈夫死國婦人死夫義也今城且陷吾必死於是若等能吾從乎皆泣曰有死而已無他志也縊而死者六人有十歲女度其不能自死則給之曰汝稽顙拜佛庶保我無恙也甫拜卽挈米囊壓之死乳媪抱其幼子旁立以泣柏帖穆爾熟視歎曰父死國母死夫妾與女從父者也皆當死汝三歲兒於義何所從乎爲宗祀計可也乃命媪抱匿旁近民舍而斂金珠畀之曰卽有緩急可以此贖兒命有頃兵入城卽舉鎧自然四圍窗火大發遂焚死

迭里彌實字子初回回人性剛介事母至孝年四十猶不仕或問之曰吾不忍舍吾母以去也以宿衛年勞授行宣政院崇教三遷爲漳州路達魯花赤居三年民甚安之時

元史卷四十九 列傳

五

陳有定據全閩八郡之政皆用其私人以總制之朝廷命官不得有所與明兵旣取福州興化泉州皆納款亡何吏走白招諭使者至請出城返之迭里彌實從容語之曰爾第往吾行出矣乃詣廳事具公服北面再拜畢引斧斫其印文又大書手版曰大元臣子卽入位端坐拔所佩刀割喉中以死旣死猶手執刀按膝坐儼然如生郡民相聚哭庭中斂其尸葬東門外時又有獲獨步丁者回回人前進士累官僉廣東廉訪司事有呂復者爲江西行省左右司都事皆閑居寓福州以行省命攝長樂縣尹福州旣下獲獨步丁曰吾兄弟三人皆忝進士受國恩四十年今雖無官守然大節所在其可辱乎以石自繫其腰投井死復亦曰吾世食君祿今雖攝官若不以死報國則無以見先人

於地下引繩自經死獲獨步丁之兄曰穆魯丁者官建康  
曰海魯丁者官信州先後皆死國難云

忠義五

元末死河南遠陽  
山東閩粵者八傳

張桓字彥威真定臺城人父木知汝寧府因家焉桓以國  
子生釋褐屢遷陝西行臺監察御史以言事不合去未幾  
汝寧盜劉福通兵起桓避之確山賊久知桓名襲獲之羅  
拜請爲帥弗聽囚六日擁至渠魁前桓直趨據榻坐與之  
抗論逆順賊徒粹桓起跪桓仰天大呼詈叱且屢唾賊面  
賊猶不忍殺謂桓曰汝但一揖亦恕汝死桓瞋目曰吾恨  
不斬汝首反爲汝折腰邪賊知終不可屈遂刺之年四十  
八賊後語人曰張御史真鐵漢害之可惜事聞贈禮部尙  
書諡忠潔

元史卷四十九 列傳

美

郭嘉字元禮濮陽人祖昂父惠俱以戰功顯嘉登泰定三  
年進士第屢遷監察御史會朝廷以海寇起欲於浙東溫  
台慶元等路立水軍萬戶鎮之令嘉乘驛至慶元與江浙  
行省會議可否嘉至首詢父老知其弗便請罷之會方擇  
守令綏靖遼東乃授嘉廣寧路總管兼諸奧魯勸農防禦  
屬盜起軍旅數興供餉無虛日民苦和糴轉輸而吏胥得  
因時爲奸嘉設法計其戶口第其甲乙民甚便之有詔團  
結義兵嘉招集民數千教以坐作進退千百夫各統以長  
號令齊一賞罰明信故富強爲東方諸郡取十八年劉福  
通賊黨關先生等由大同陷上都嘉率義兵出禦旣而遼  
陽陷嘉將眾巡邏去城十五里遇青號隊五百餘人給言  
官軍嘉疑其詐俄果脫青衣變紅嘉分兵兩隊夾攻之生

禽賊數百死者無算然賊勢日熾孤城無援乃集同官議  
攻守計竭家所有衣服財物犒士頃之賊至圍城匝數十  
里有大呼降者嘉挽弓射殺之賊稍引退嘉遂開西門逐  
之賊大至力戰死事聞贈太原郡公諡忠烈

周喜同河西人初爲後宮衛士眾稱其才選充承徽寺經  
歷再調南陽縣達魯花赤居二歲妖賊起陷鄧州人情洶  
洶俄而賊鋒抵南陽南陽無城無兵賊入之若虛邑喜同  
以計獲數賊詰之云賊將大至悉斬之以安眾心晝夜督  
丁壯巡邏守備時大司農錢木爾以兵駐諸葛庵爲賊襲  
死賊遂乘銳取南陽喜同守西門望見賊勢盛卽與家人  
訣已而城中皆哭喜同策厲義兵連日再戰殺賊數百賊  
知無援攻益急城遂陷喜同突圍賊橫刺其馬馬蹶喜同

元史卷四十九

列傳

七

鞭馬躍而起手斬刺馬者俄爲他賊追及身被數創遂見  
執爲所殺妻邢氏聞喜同戰死帥家僮數人出走遇賊奪  
賊刀斫之且罵且前亦見殺一家死者二十餘人贈南陽  
路判官時襄陽錄事司達魯花赤塔不台字彥暉者元統  
元年進士魏王軍汝亳塔不台來供餉魏王嗜酒輕戰備  
一夕賊劫王王臥不能起爲所執塔不台馳騎奪王亦爲  
賊所得比明見賊酋王拜乞活塔不台以足蹴王曰猶欲  
生乎賊復屈其拜塔不台拒而詬之且與縛者角遂支解  
死

王英字邦傑益都人性剛果有膂力善騎射襲父職爲莒  
州翼千戶父子皆善用雙刀人號之曰刀王至元二十九  
年江西行樞密院命討南雄賊元貞元年從左丞董士選

討太山賊二年討永新安福二州賊皆平之延祐二年寧都賊起行省命英率各萬戶軍討之屢戰皆勝行省平章李世安遣英返江浙平章張閻所領軍於閩境至上虎嶂遇賊三千餘人盡殲之至治元年以大臣薦授忠武校尉益都淄萊萬戶府副千戶天祿元年授宣武將軍至順二年行省命英招捕桂陽州賊張思進等二千人相率請降元統元年授懷遠大將軍同知海北海南道宣慰使司事後至元三年平萬安軍賊吳汝期等三千人未幾李志甫起漳州劉虎仔起潮州詔江西行省右丞燕帖木爾討之時英已致仕平章伯撒里謂僚佐曰是雖鼠竊狗盜非刀王行不可乃使迎致之英曰國家有事吾雖老可坐視乎據鞍橫槊精神飛動馳赴焉及賊平英功居多至正中毛

元史卷四十九

列傳

三

貴陷益都英時年九十有六乃謂其子弘曰我世受國恩今老矣縱不能事戎馬以報天子尚忍食異姓粟以求生乎水漿不入口者數日遂卒毛貴聞之使具棺衾以葬將斂舉其尸不動焚香祝曰公子弘請公歸葬先塋祝畢尸遂起觀者莫不驚異山東宣慰使普顏不花及憲司請卹典於朝有曰不食寇粟餓死芹泉有夷齊之風爲臣之清者也芹泉谷名英所居也

自列傳移入

彭庭堅字允誠溫州瑞安人擢至正四年進士第授同知沂州事毀牛皇神祠驅鄰郡上馬賊免民橫急征斂民甚便之俄以平反獄囚忤上官意遂棄去十年詔選守令以建寧路崇安縣尹起庭堅於家屬鉛山寇周良竊發犯閩關庭堅禦之有法寇不入境十一年同知建寧路總管府

事江西寇熾庭堅率民兵克復建陽又進兵平浦城十二年攝僉都元帥府事與邵武路總管吳按攤不花夾攻邵武庭堅設雲梯火礮晝夜搏擊寇遁追斬渠凶邵武悉平總兵官江浙參政章嘉上功於朝升同知福建道宣慰使司副都元帥鎮邵武冬寇陷建寧十三年庭堅統兵次泰寧寇懼請降復建寧還師邵武十四年盜侵政和松溪江南行臺中丞吳鐸檄庭堅赴援時麾下萬戶岳煥素悍縱卒爲暴庭堅繩以法煥懼使部卒乘不備詐爲賊兵突入營眾潰庭堅獨留不去遂遇害年四十三故吏張椿儒士夏志行江晃奉柩還崇安民哀泣如喪父母立祠祭禱數降靈響旁邑立祠亦如之南行臺監察御史余觀行部巡察獲其賊斬之爲上其事贈福建道宣慰使都元帥封忠

元史卷四十九

列傳

五

愍侯

王伯顏字伯敬濱州霑化人至正九年知福寧州居三歲大著威惠遷福建鹽運副使將行會鄰境賊警州父老數百詣憲府乞畱伯顏仍領州事從之乃與監州阿撒都刺令民丁分掘險要各自爲守而自練壯士千五百人備戰賊柵楊梅嶺伯顏與子相馳破之是秋賊自邵武間道迫福寧賊帥王善擁眾萬餘直壓州西門眾寡不敵士卒奔潰伯顏惟率麾下百十人奮身射賊俄馬中流矢墜地遂見執善聞伯顏政聲欲使爲州尹伯顏訶叱之左右搃以跪弗屈遂毆之伯顏嚙舌出血嘆善面罵曰反賊殺即殺何以毆爲吾民天民也汝不可害大丞相親討叛逆百萬之師雷擊電掃汝輩小醜將無遺種顧敢爾邪賊亦執阿

撤都刺至善厲聲責其拒鬪噤不能對伯顏復唾善曰我與監州殺賊何言拒耶我死必爲明神以滅汝言訖挺頸受刃頸斷不僵出血皆白死數日而色如生州人哭聲連巷子相亦被執賊欲官之相嘗曰汝吾君父之仇義不戴天恨不寸斬汝賊復殺之相妻潘氏挈二女爲賊所獲亦罵賊母子同死伯顏旣死賊時睹其陳兵出入明年州有僧林德誠者起兵討賊乃望空拜禱曰王州尹宜率陰兵助我被賊時賊正祠神覩紅衣軍來以爲僞帥康將軍亟往迎之無有也四面皆青衣官軍賊大駭敗走斬其酋江三蠻福寧遂平事聞贈濟南路總管上輕車都尉太原郡侯陳高狀其行

見不繫舟漁集

劉濬字濟川其先興州人曾祖海金進士第一仕至河南

元史卷四十九 列傳

三

府尹死國難子孫遂家河南濬由廉訪司書吏調連江縣寧善鄉巡檢至正十三年江西賊帥王善寇閩官軍守羅源縣與連江接壤勢將迫濬妻真定史氏故相家女也有才識謂濬曰事急矣可聚兵以捍一方盡出籤中物募壯士百餘命仲子健將之浹旬至數萬賊尋破羅源分兩道攻福州濬拒之辰山三戰三捷俄聞福州陷眾多潰去濬獨帥健兵進遇賊於中麻突其陳斬前鋒五人賊兵大至鏖戰三時頃濬中箭墮馬健下馬掖之俱破獲濬忿戟手大罵賊縛之堦下先斫手一指罵彌厲再斫一指亦如之指且盡斫兩腕次及兩足濬色不少變罵聲猶不絕遂割其喉舌而死健亦以死拒賊善義之舍健使斂濬屍瘞之健歸請兵於帥府以復父仇弗聽遂盡散家貲結死士百

人詐爲工商流勾入賊中夜半發火大譟賊驚擾自相屠戮健手刃其殺父者并禽善及寇首陳伯祥來獻磔之事聞贈濬福建行省檢校官授健古田縣尹官爲濬立祠福州北門外

多里不花

多舊作宋

字端甫蒙古人始爲宿衛官累歷顯要拜

江西行省平章政事與平章阿爾渾沙等分道討陳友諒遂泛海南下趨廣東駐師揭陽降土寇金元祐招復循梅惠三州之寇承制官其酋長俾治賊以給兵食又別規粟四千石輸送京師自是英肇欽連諸郡皆附且治兵由梅嶺以圖江西而元祐有異志託以鎮服其土遮道固畱先是制書命劉巨海僉廣東元帥府事未發元祐竊取易其名私畀獯賊劉文遠誘與偕亂事覺文遠伏誅而元祐及

元史卷四十九 列傳

三

其弟元秦子榮竄匿不獲俄榮率外賊突入奪符信殺官吏多里不花與參政楊泰元等勒兵拒戰而賊來益眾多里不花中鎗創甚其子達蘭不花率麾下力抗死之多里不花被執擁至太平橋罵不絕口遂爲賊殺其妻卜顏氏妾高麗氏在側不去皆遇害其部將哈乞吳普顏阿刺不花台不花等俱戰死

忠義六

元末死節士人并遺老共四傳

顏瑜字德潤兗州曲阜人克國復聖公五十七代孫也以行誼舉教諭至正十八年田豐起山東瑜攜家走鄆城道遇賊脅瑜曰爾書生吾不爾殺可從我見主帥瑜罵曰爾賊何主帥耶賊怒欲殺瑜瑜無懼色復使之寫旗瑜大詬之賊以槍刺瑜至死罵不絕口妻子皆爲所害又有曹彥



可者亳州人會妖盜起里中多田野無賴子目不知書既破毫揭帛於竿皆羣趨彥可家劫之使寫旗迫以刀斧不顧亦見害年七十矣有司具以事聞中書給貲以葬賜諡節愍

喬彝字仲常晉寧人少時高介有名至正十八年汝穎賊黨關先生等由絳州垣曲縣襲晉寧城陷城中死者十二三彝整衣冠聚家人坐井上令妻子婢輩循次投井中而已隨之彝既死賊首王士誠使人卽其家邀致之至則已死矣賊平朝廷贈彝臨汾縣尹諡純潔有汾州張岳起晉寧王佐者皆士人也竝以不屈賊死又有建昌吳德新者工醫畱京師久之嘗往寧夏遇盜見執脅降不屈自投井中猶仰罵賊賊下射矢貫其頂罵益力賊怒以長槍刺之

元史卷四十九 列傳

三

然亦壯其志憐其死曰此真丈夫也以土埋井而去

楊乘字文載濱州渤海人至正初爲介休縣尹民饑散爲盜乘立法招降之累官江浙行省左右司員外郎坐海寇掠漕糧舟免官寓居松江張士誠入平江其徒郭良弼董綬交推之士誠遣張經招乘乘曰良弼綬皆名臣今已失節願欲引我以濟其惡邪且讓經平日讀書云何經俛首不能對乘日與客痛飲竟日不言經急促其行乘整衣冠自經死年六十四

劉鶚字楚奇永豐人累官至翰林修撰少力於學愛孔子富貴如浮雲之語築浮雲書院以教鄉族子弟割田廩養吳澄重之爲序其詩皇慶壬子遊淮東董宣慰聞其賢薦於朝充揚州儒學錄泰定乙丑授汴省掌教齊安河南三

書院至正元年擢湖廣儒學提舉時學田若干畝爲有力所據者三十年鶚首建言臺省盡復其田居未幾擢祕書監郎與虞集揭傒斯歐陽玄往還唱和其浮雲書院揭記之歐虞賦之十年擢翰林修撰十二年除江州路總管時紅巾賊起郡邑瓦解鶚勵精爲恢復計兵威甚振寇莫敢犯十七年遷廣東廉訪副使十九年奉命鎮韶修城池繕甲兵二十年擢廣東閩帥其少子運亦以功特加廣東副元帥二十二年拜行省參政屢卻寇氛民恃爲保障二十四年韶洞獠作亂鶚分兵討之疏請益師不報而贛寇數萬猝至父子親冒鋒鏑戰數月兵困城陷運先陳亡鶚被執幽於贛之慈雲寺終始罵賊不屈而死粵人爲立憲節祠所著有惟實集若干卷

舊史無傳此編劉鶚集者錄其事蹟

元史卷四十九

列傳

三

